

四庫全書

史部

欽定四庫全書

史部

山西通志卷二百二十四

詳校官給事中<sub>臣</sub>王鍾健

檢討<sub>臣</sub>德生覆勘

總校官進士<sub>臣</sub>朱 鈐

校對官中書<sub>臣</sub>李斯咏

謄錄監生<sub>臣</sub>王鍾岱

欽定四庫全書

山西通志卷二百二十四

藝文

四十  
詩四

七律

下

金

遊龍山

章宗

嵯峨雲影幾千重  
高出塵寰迥不同  
金色界中兜率境  
碧蓮花裏梵王宮  
鶴驚秋露三更月  
虎嘯踈林萬壑風

試拂花箋為覓句詩成自適任非功

悲長平

蕭貢

秦兵伏甲武安西趙將非材戰士攜千里陣雲沈曉日  
萬家屋瓦震秋輦哀纏朽骨天應泣怨入空山鳥不棲  
百戰區區竟何得阿房煙草亦淒迷

登縣山上方

環合青峰插劍長小平如掌寄禪房危闌半出雲霄上  
祕景盡收天地蒞野濶羣山驚破碎雲低滄海認微茫

九華藉甚因人顯迥秀可憐天一方

代州書事

趙秉文

金波曾醉鴈門州端有人間六月秋萬古山河雄朔部  
四時風月入南樓漢家戰伐雲千里唐季英雄土一丘  
繫馬朱欄重回首烟波誰在釣魚舟

淮陰侯廟

地險山危氣勢雄將軍從此建奇功興劉業就人何在  
破楚名存事已空故壘帶烟餘殺氣荒祠向晚動悲風

功名蓋世今如此讀罷殘碑思不窮

登六賢堂

楊雲翼

榆關城構倚長天寂寂虛堂像六賢  
善行既皆傳故里功名何異寫凌烟  
子孫繼業誰知在桑梓牽情我自憐  
無限雲山遮遠日登臨時遣興悠然

游河西孫氏園

毛麾

亭榭依山水亂鳴已如罨畫障中行  
照溪芳樹紅雲合迎客幽禽翠羽輕  
毫氣未饒金谷友醉魂如到錦官城

猶慚歸騎忽忽去不得持杯待月明

題崞縣郝子玉此君軒

毛端卿

桂林名姓一枝新萬竹青青德有鄰  
渭上風烟分別派山陽詩酒屬閒人  
心期已到冰霜窟眼界不知花柳塵  
萱背從今看輝映嫩香新粉四時春

薄遊同郝漕子玉賦

元德明

全晉山河百戰場登臨歷歷見興亡  
夷居猶雜尤堪歎霸氣沈雄亦未量  
石瓮烟霞詩秀潤駘祠風月酒淋浪

書生不是功名具，慚媿山翁問葛強。

太原古城惠明寺搶秋望

西山萬古壯陪京，一日汾流入廢城。  
浩浩市聲爭曉集，昉昉原隰但秋畊。  
晉公老去詩仍在，越石公來恨未平。  
千尺浮圖莫烟底，瓦盆濁酒為誰傾。

寒食遊福田寺

春山寂寂掩禪扉，複嶺盤盤入翠微。  
布襪青鞋供勝踐，粥魚齋鼓薦玄機。  
日烘幽徑綠烟煖，風定曉枝紅雨稀。



曾是西堂讀書客不應啼鳥也催歸

玉屏山

李純甫

包裹青衫已十年聰明更覺不如前簿書叢裏先抽手  
風月場中少息肩瓶底剩儲元亮酒杖頭高掛老坡錢  
會須看我屏山下盡生平不問天

真味堂

問渠真味若為言不著鹽梅也自全龜鼎大夫徒染指  
麴車公子漫流涎胸中已有五千卷徽外更聽三兩絃

此老清饒何所嗜  
宦名嚼蠟已多年

天游齋

大人未始出吾宗  
草靡波流盡太沖  
七竅鑿開無混沌  
六根消落盡圓通  
法身兔角聲聞外  
塵事牛毛夢幻中  
誰會天游更端的  
瘦梅疎竹一窻風

瓢庵

書生祇合飽黃齏  
大嚼屠門計似癡  
壁上七絃元自雅  
囊中五字更須奇  
橫陳已覺如嚼蠟  
皆醉何妨獨啜醅

此味欲談舌本強如人飲水只渠知

送妹夫之太原

邊元鼎

山含秋氣冷參差送客西城落日低  
怨別弟兄歸快快戀鄉車馬去遲遲  
浮萍聚散元無定流水東西却有期  
惆悵黃榆故山路碧天回首鴈南飛

留仲澤

酈權

朝衫酒濕紫宸霞  
暫輟旌旗擁使華  
馳馬彎弓真將種  
載書囊筆自名家  
江湖萬里春回鴈  
燕趙千林月滿花

明日升沈便霄壤更留玉樹倚蕙葭

題晉卿王暉寶繪堂

完顏璫

顧陸張吳寶繪堂風花雪月保寧坊錦囊玉軸三千幅  
翠袖金釵十二行數筆丹青叅季范一時遷謫為蘇黃  
太原珍玩名天下舊跡猶憑古印章

游太寧寺

王璫

西山踏破萬層青與客攜壺上太寧泉石有情容避俗  
軒裳無術可逃形雲縈屋角僧禪靜露下松梢鶴夢醒

明日却尋塵境去  
曉猿啼月若為聽

年節嵐州席上贈同知王子直中散

朱自牧

別時風雪暗龍津  
一夢經年復見君  
去國光陰雖易得  
夾河形勢且平心  
如征馬常嘶代身  
伴秋鴻却渡汾  
此日一尊難惜醉  
新年風景舊知聞

過渾源留別田仲祥同知節使

金臺前夢杳無蹤  
一阻雲山莫計重  
雙鯉附書常不達

兩萍浮海偶相逢  
燕南落日車分轍  
代北春風酒滿鍾  
明日去留牽世務  
燈前談笑且從容

哀隆德守臣張確  
確浮休張舜民之弟  
嘗為烏延帥幕  
獨不廷謁  
童貫作詩弔之  
滕茂實

睢陽萬古一張巡  
忠義傳家有世臣  
顏子服膺當入室  
潘郎望拜肯同塵  
圍城已陷天猶晦  
仗劍臨危氣益振  
餘子鄰邦盡曹李  
偷生端作九泉人

碧鮮堂

趙大端

寒陰鎖碎暗僧軒  
玉立森森翠滿前  
墜露路修梢雲影濕  
破綉春筍綺文鮮  
雅宜冷映梅溪月  
尤稱香浮茗竈煙  
清夜沉沉正成寐  
恍疑飛夢繞淇川

遊方山

王雷

車輪馬足徧人間  
豈意窮荒逢此山  
便欲棲遲成地隱  
始知空濶破天慳  
松聲萬壑秋風急  
石徑千盤暮雨斑  
為報草堂真碧眼  
莫教辜負箇中間

懸泉

袁從乂

翠巖高列勢摩天巖上轟雷瀉玉泉絕壁飛來渾是雨  
長風捲去忽成煙圍茅小隱初經眼跨鶴先儒已著鞭  
吟罷徜徉眠月窟夢回猶聽鼓齎齎

元氏桂軒為敏之賦

王萬鍾

簾捲堂前桂子涼一軒燈火夜初長月中春好元無價  
天上風來別有香棠棣一家同映秀詞林百世繼餘芳  
閒花野草空無數掩盡人間獨擅場

題滕奉使祠

姚孝錫



本期蘇鄭共揚鑣不意芝蘭失後凋遺老祇今猶涕洟  
後生無復識風標西陲鴈度霜前塞滹水樵爭日莫橋  
追想生平英偉魄凌雲一笑豈能招

太原

元好問

夢裏鄉關春復秋眼明今得見并州古來全晉非無策  
亂後清汾空自流南渡衣冠幾人在西山薇蕨此生休  
十年筆弄文昌府爭信中朝有楚囚

龍興寺閣

全趙堂堂入望寬九層飛觀儘高寒空聞赤幟疑軍壘  
真見金人泣露盤桑海幾經塵劫壞江山獨恨酒腸乾  
詩家總道登臨好試就遺臺老樹看

李長源

冀都事死東州禍李翰林凶陝府兵方為騷人箋楚些  
更禁書客墮秦坑石苞本不容孫楚黃祖安能貸禰衡  
同甲四人三橫賈此人雖在亦堪敬焉

王仲澤

太學聲華弱冠馳青雲岐路九霄飛上前論事龍顏喜  
幕下籌邊犬吠稀壯志相如頭碎柱赤心嵒紹血沾衣  
從來聖牘褒忠義誰為幽魂一發揮

晉溪

石磴雲松著色屏岸花汀草展江亭青瑤疊甃通縣甕  
白玉雙龍掣手迅雷地脉何嘗間今昔尾閭真解泄滄溟  
乾坤一雨風塵了好就川源問乞靈

寄劉繼元

清霜茅屋耿無眠坐憶分攜一慨然楚客登臨動歸興  
謝公哀樂感中年淒涼古驛人烟外迤邐荒山雪意邊  
千樹春風水楊柳待君同繫晉溪船

石嶺關書所見

軋軋輶車轉石槽故關猶復戍弓刀連營突騎紅塵暗  
微服行人細路高已化蟲沙休自嘆厭逢虎豹欲安逃  
青雲玉立三千丈元只東山意氣豪

過鴈門關

四海於今正一家生民何處不桑麻重關獨據千尋嶺  
深夏猶飛六出花雲暗白楊連馬邑天低青塚渺龍沙  
憑高弔古情無極空對西風數去鴉

過應州

平野風埃接戍樓邊城三月似窮秋人家土屋纔容膝  
驛路旃車不斷頭隨俗未甘嘗馬潼敵寒直欲御羊裘  
十年紫禁烟花繞此日雲山是應州

羊腸坂

浩蕩雲山直北看，凌兢羸馬不勝鞍。  
老來行路先愁遠，貧裏辭家更覺難。  
衣上風沙歎顛顛，夢中燈火憶團團。  
憑誰為報東州信，今在羊腸百八盤。

赤石谷

林罅陰崖霧杳冥，石根寒溜玉玎玲。  
雲來朔漠疑秋早，山近清涼覺地靈。  
靜愛鳥聲存野調，鬧嫌人跡帶塵腥。  
南臺說有金銀氣，可是并汾處士星。

雪中過石嶺關

老天黯慘入平蕪朔吹崩奔萬竅呼雪意旋粧行路景  
詩家新有入關圖地爐圍坐慚田父絮帽衝寒怨僕夫  
故國烟花重迴首蜀橙山麝記金壺

秋夜

九死餘生氣息存蕭條門巷似荒邨春雷謾說驚坯戶  
皎日何曾入覆盆濟水有情添別淚吳雲無夢寄歸魂  
百年世事兼身事尊酒何人與細論

外家南寺

鬱鬱楸梧動晚烟一庭風露覺秋偏  
眼中高岸移深谷愁裏殘陽更亂蟬  
去國衣冠有今日外家梨栗記當年  
白頭來往人間徧依舊猶窻借榻眠

感興

夜宿讀書山作

倚梯從昔望烟霄七葉何人竟珥貂  
道路常教車歷鹿功名惟有鬢飄蕭  
勤如韓子初無補晚似馮公豈見招  
五十三年等閒裏一牕風葉雨瀟瀟

橫山寺



浮屠百尺聳亭亭落日鴉啼野蔓青故國盡消龍虎氣  
橫山猶帶鳳凰形金根輦路迎禪駕玉樹歌臺語梵林  
惟有滹沱河上月年年隨鴈過寒汀

聖阜危樓

聖母留殘此混融一堆寒碧現神功巨鰲突出海波沸  
靈鷲飛來天竺空文石異時傳勝概危亭何日架晴虹  
搏扶九萬非吾事且放雲山入座中

神山谷刹

平地孤峰屹一拳伊誰建寺在危巔金身入夢基初立  
白馬駝經刹始安碑斷猶存蚪蚪字樑空不辯漢唐年  
山前借問緇衣老屈指桑田幾變遷

崇棣堂

周元帥  
獻臣宅

千古吳中富貴家秋風吹送洛陽花貞妃鏡裏春先老  
玉女車邊日易斜紀瑞定誰增舊譜換根原自有靈砂  
來遲不及西堂晏猶想分香入棣華

餘慶堂

亦元帥宅

五年霜戟照康莊萬里春風擁畫梁已覺并汾增勝氣  
更從王郝借餘光靈椿丹桂知難老玉爵金符豈易量  
剩着牋毫授辭客南堂兼是棣華堂

野谷道中懷昭禪師

行行汾沁欲分疆漸喜人聲挾兩鄉野谷青山空自繞  
金城白堦已相望湯翻豆餅銀絲滑油點茶心雪蕊香  
說向阿師應被笑人生生處果難忘

寄欽止李兄

征車南北轉秋蓬  
關塞相望兩秃翁  
袞袞便隨當世路  
悠悠難復倚天公  
銅駝荊棘千年後  
金馬衣冠一夢中  
樽酒雲州古城下  
幾時攜手笑春風

壽聖院古柏詩

普信

老柏千株不記年  
滿堂中夜冷生煙  
不容明月秋幽地  
欲作驚蛇春上天  
雪後未忘夫子道  
風前猶記祖師禪  
曉聞寒韻披衣起  
錯認廬山落澗泉

元

過天山周敬之席上和入韻

耶律楚材

憇馬居延酒半醺  
寂寥寒館變春溫  
未能鵬翼騰溟海  
不得鴻音過鴈門  
千里雲煙青塚暗  
一天風雪黑山昏  
天涯幸遇知音士  
子細論文共一樽

過東勝用先君文獻公韻

依然千里舊山河  
事改時移隨變磨  
巢許家風烏可少  
蕭曹勳業未為多  
可傷陵變須耕海  
不待碁終已爛柯  
翻手榮枯成底事  
不如歸去入無何

過青塚用先君文獻公韻

漢室空成一土丘至今仍未雪前羞不禁出塞涉沙磧  
最恨臨軒辭冕旒幽怨半和青塚月間雲常鎖黑河秋  
滔滔天塹東流水不盡明妃萬古愁

寄天山周敬之

當年傾蓋識君初爛飲天山駐使車秋去安仁空有賦  
鴈來公瑾又無書林巒紅葉如人老籬落黃花亦我疎  
為向天涯道岑寂強吟新句附雙魚

過太原南陽鎮題紫微觀壁

廷臣侍從茂前驅  
道侶忻奔迓使車  
縣吏喜聞新號令  
村民爭認舊中書  
纍纍山果盈磁鉢  
薄薄濁醪半瓦壺  
隱逸競詢新事跡  
幾時遷洛卜新都

望陰山

丘處機

高如雲氣白如沙  
遠望那知是眼花  
漸見山頭堆玉屑  
遙觀日脚射銀霞  
橫空一字長千里  
照地連城及萬家  
從古至今常不壞  
吟詩寫向直南誇

題天壇二首

峩峩峻嶺接雲衢  
古柏參差數萬株  
瑞草不容凡眼見  
靈禽祇傍道人呼  
鑿開洞府羣仙降  
煉就丹砂百怪除  
福地名山何處有  
長春即是小蓬壺

四面諸山若附庸  
突然中起最高峰  
每看晴日移壇影  
常說寒潭卧黑龍  
沆瀣要和千歲藥  
茯苓先斲萬年松  
擬尋活計參真趣  
又隔烟蘿第幾重

題北台觀壁

李俊民



幾年空負北山移今日方知見是遲猶憶王鳧初去後  
忽驚丁鶴暫來時雖無壁上題名記頗愧棠陰聽訟詩  
拍似荒城舊游處西風搖落菊花期

憶郝伯常

劉因

一檄期分兩國憂長纓不到越王頭玉虹醉吸金陵月  
玄鶴孤遊赤壁秋漠北蘇卿重回首天南王粲幾登樓  
飛書寄與平南將早放樓船下益州

重遊石壁山

郝音濟圖

山不幽深境不靈平生賞鑑盡山情却波三刹境都勝  
石壁一巖山最名獨恠入林通窈窕數峰涌地出崢嶸  
招提更在雲深處未到遙聞梵唄聲

過太行山

周伯琦

太行蒼翠插秋旻疊嶺重關自昔聞戰國東西分晉趙  
中原南北帶河汾帝王都邑青青草豪傑勛名點點墳  
鳥道盤空頰立馬便從高處望飛雲

過天井關

劉秉忠

雲冷風高天井闕太行嶺上看河灣九州占絕中原地  
一塹攔迴左界山王霸分爭圖未捲英雄鏖戰血猶殷  
華陽春色年年綠汗馬南來不放閒

雲內道中

遠水平蕪間野花塞雲漠漠際寒沙閒禽向晚無投樹  
倦客逢秋更念家萬里經年走風雨一身無計卧烟霞  
來朝又上居延道懷古思君改鬢華

豐州

邊山瀾瀾水西流夾路離離禾黍稠出塞入塞動千里  
去年今年經兩秋晴空高顯寺中塔曉日平明城上樓  
車馬闐駢塵不到吟鞭斜裊過豐州

過狄仁傑墓

楊果

牝雞聲裏紫宸寒神器都歸竊弄間一語喚回鸚鵡夢  
九霄奪得鳳雛還荒墳寂莫臨官道清節孤高重泰山  
為問摸稜蘇相國當時相見果何顏

後唐明宗廟

徐世隆

徽陵當日拯殘唐五季之間號小康因獸害田秋罷獵  
為民求主夜焚香八年功德丹青在千古明靈祭祀長  
欲識此邦遺愛事廟槐人敬似甘棠

自太白望霍岳

王惲

山行四月似涼秋半搖鞭下嶺頭心苦自憐嘗越膽  
長歌不用撫吳鉤風烟動色開中鎮禾稼連雲際四州  
碌碌一官成底事春風歸夢仲宣樓

虞鄉道中

中條如畫色蒼蒼雨過晴嵐帶夕光望入王官饒水竹  
路經虞坂乍耕桑未容巖桂相招隱自笑微官有底忙  
多謝曉風驅暑退笠簷吹作馬頭涼

夏縣道中

溼雲壓樹際崗平溽暑還因小雨增官吏困人如縛虎  
秋風吹野夢翻鷹趨時未必儒冠誤並隱端為野鶴憎  
遙憶筠溪亭下水萬竿蒼雪照吟燈

遊冠山

王構

縹緲樓臺出翠微  
東山豪傑曉相攜  
雲深石室老僧住  
花落松庭幽鳥啼  
滿目風烟嘉水上  
千年勝概井陘西  
金螺紫酒陽春曲  
拚取歸來醉似泥

寒食祀墳迴登臨晉西原廢寺

陳賡

前朝廢寺枕山阿  
尚有摩雲宰堵波  
故國已非唐日月  
老僧猶指晉山河  
年來筋力登臨倦  
亂後心情感慨多  
石蘚荒碑碎文字  
他年更得幾摩挲

當年雲構倚天開  
一夕烟塵化劫灰  
佛閣丹青餘瓦礫

禪房花木亦蒿萊  
春風萬里騷人怨  
落日千秋杜宇哀  
斷碣荒烟無限意  
一章詩律為誰裁

題郝伯常鴈足詩

袁 桷

深羈孤館鬢毛斑  
猛虎搖闌障海寰  
玉樹已歌歸逝月  
羽書難射隔平山  
不須羝乳終回漢  
肯學雞鳴詐度關  
一寸蠟丸憑鴈寄  
明年春盡竟生還

聖母祠前禱雨

富珠哩翀

天泓雪霤蔭寒松  
聖母祠前可鑑容  
水利萬家豐稻畝



山靈千古壯桐封  
司炎政虐連雲稼  
使憲情深望雨農  
一灑甘霖遍寰宇  
泉闕噀起抱珠龍

興和道中

張養浩

底事勞勞形與神  
道途鞍馬動經旬  
烟橫絕澗疑無地  
風響深林似有人  
早發舉鞭揮霧露  
夜行翹首認星辰  
何時却逐桑榆晚  
愛殺坡仙此語真

鴈門送楊仲弘姪士耕歸龍泉

丁復

伯也未入玉堂日  
我亦忝薦金閨名  
三千里外嗟淪落

二十年餘異死生猶子初從鴈門見故鄉能作龍泉行  
腸斷東門別小阮索詩相送若為情

題劉京叔歸潛室

薛元曦

獨構茅堂養道真滿前俗事罷紛紛  
磻溪夜釣波心月汾曲春耕隴上雲  
長笑熊羆勞應夢直教猿鶴怨移文  
近來傳得安心法萬壑松風枕上聞

午芹道中

段成已

渺渺江風吹葛衣愛閒長與世相違  
青絲步障柳千樹

碧玉屏風山四圍  
入眼江花如慰意  
近人沙鳥信忘機  
虛名到此成何事  
一笑平生始覺非

書臨晉廳壁

王思誠

條山河水壯封疆  
城外眉原百里長  
蒲坂東來通猗頓  
桑泉南下接虞鄉  
唐家舊德推裴寂  
漢世元勛憶霍光  
故國松楸今尚在  
穹碑高塚映斜陽

砥柱

鬼斧神工砥柱開  
黃流滾滾自天來  
三門浪捲千堆雪

五戶灘硃萬壑雷漕轉多虞舟楫敗疏排幾使匠夫哀  
唐虞平治功歸禹廟下豐碑滿綠苔

題天橋子

按轡臨深喪客懷神功鑿破石崔嵬橋頭駭浪翻銀屋  
峽口洪波瀉玉杯飲澗虹盤千尺影砮崖龍起半空雷  
阿誰窮得河源處不盡濁流滾滾來

壽陽道中遇雪

十月燕州冷不堪朔風如劍入衣衫羊頭雪映鴉兒峪

馬首雲連燕子巖絕澗冰消泥滑滑斷崖土落路巉巉  
昌黎奉使曾經此驛舍題詩壁上龕

謁司馬溫公祠

丞相祠鄰孔廟垣高墳老樹涑河干諸儒傳授淵源遠  
二聖遭逢禮數寬到處蒼生思久相每聞強虜問平安  
想當歸葬鄉閭日巷哭塗哀涕淚闌

鴈自代過晉嶺客中感興

張翥

鴈行初自鴈門來遠度平沙陣勢開光祿塞空霜氣冽

受降城廢水聲哀烏孫公主歌難和猿臂將軍射未回  
今日客中腸易斷不須更上最高臺

題洪谷子楚山秋晚圖

鄧文原

舊知洪谷古先傳五尺橫圖見十洲千嶂排空青玉立  
一江流水白雲浮瑯檐共話當年雨丹葉誰憐滿徑秋  
最是無聲詩思好恍然身在赤城游

王晉卿畫

吳鎮

晉卿繪事誠無匹尺素能參造化功碧樹依微春水濶

蒼山縹緲暮雲籠幽深自覺塵氛遠閒淡從教色相空  
更喜涪翁遺墨好草堂何必獨稱工

霍山

張守大

名山佳景遂幽尋雨過烟浮鬱翠岑地接紺園珠斗近  
泉通玉竇白雲深野花好鳥資禪性露竹風杉供醉吟  
擬向東鄰結蓮社不妨頻此抱瑤琴

日新觀

九箕山下地仙家與客尋真步落霞洞裏清香燒栢子

鑪中新茗煮松花古壇寂寂春常在浮世悠悠日已斜  
聞說道人騎鶴去料從勾漏問丹砂

師曠廟二首

草綠東原霽景浮杖藜閒步思悠悠楊侯城外烟村古  
師曠祠前野水流遺俗不堪悲往事新詩聊復記曾遊  
當年冠蓋俱塵土祇見殘陽下故丘

衰草寒烟子野祠升堂拂蘚讀殘碑知音迴出師涓右  
典樂常懷晉悼時已辨哀吟傳濮水還因規諷及祁奚



淫哇此日知誰正  
悵望遺墟有所思

靈淵廟禱雨

劉源

龍宇尊臨大萬山  
松崗石蹬入躋攀  
千尋頑嶂雲華秀  
一坎靈湫月窟閒  
變化無方出神策  
禱祈有應破天慳  
濟時何止西風雨  
動看為霖徧世間

題靈淵

清溪庄上有靈泉  
迸出珍珠顆顆圓  
易結易成容易散  
難收難拾線難穿  
魚遊水底身全現  
鳥立枝頭體倒懸

堪羨世間無此處故留詩句在庄前

題西古寺

法界莊嚴紫霧中此中端的却空空栽培一簇菩提樹  
粧點幾重兜率宮鉢底潛龍時天矯錫頭伏虎日從容  
光明照破虛空處杲杲東生日色紅

題聖母祠

聖母臺高豁壯眸神功基址至今留叅天老樹森森茂  
徧地飛泉處處流柳影濃遮清玉冷花香輕散碧牕浮

居人登賞諸般美羨取林泉野趣幽

絳州懷古

郭元履

東雍城端步綠苔更堪千里暮雲開  
西山鳳舞天邊去北水龍飛掌上來  
池沼盛隋餘瓦礫綺羅全晉變蒿萊  
興亡欲問無人語滿目秋風野鳥哀

鼓堆山

靳柱

高似崑崙十二臺半天擁出錦雲堆  
碧山不盡酒深淺芳草又生春去來  
登眺每知塵事遠從容常把道書開

清泉且莫將纓濯寫何詩人白玉壘

廣勝寺

麻秉彝

盤雲梯石上崇崗殿角崢嶸古道場寺紀汾陽親奏額  
塔傳阿育久騰光簷前山聳千螺秀檻外溪分二帶長  
種種塵緣都洗盡祇因身在白雲鄉

送完顏總管赴平陽

程鉅夫

汾水西南古晉州雙旌五馬漢諸侯庭無坐吏官班重  
地有遺民帝化留荆樹春風誇列土甘棠清蔭羨高秋

征騑莫嘆長安遠  
回首朝陽是薊丘

羅漢寺

刁震亨

雲幢霧幄翠陰濃  
靜廡西藍百畝宮  
冷透窓軒松竹影  
香生池沼芰荷風  
鳴禽隔葉數聲巧  
流水穿莎一徑通  
安得世間清淨福  
拂衣來作住庵翁

通明閣

韓德麟

古閣宮堯北斗齊  
朗吟飛上躡天梯  
汾流水合黃流濁  
霍岳山摩華岳低  
夜靜白雲簷下宿  
曉來明月手中携

登樓倚遍欄杆曲表裏山河望欲迷

題本州公署壁

張琪

宦途汨沒歷清苦身閱浮華過五旬七月山城多霧雨  
十年書劍老風塵日邊丹詔求賢急枕上滄江入夢頻  
撫卷題詩思無限臨軒消散自怡神

和前韻

木薛

驅馳終日走逡巡涉水登山已過旬覽鏡可能嗟短髮  
拂衣誰為浣征塵夜詳憲案留燈久路覆民詞駐馬頻

聖主九重思治化小臣無補漫勞神

觀風至隰

王進誠

登山臨水趁春暉遠播皇風敢憚疲  
夾道肅迎新憲節傾城欣覩舊官儀  
詳披疑案窮奸穴深喜遺民葺廢基  
雷雨願施宏大造甲兵洗淨復雍熙

題明月泉二首

陳嶷

人驚明月出崖前晝夜光輝映碧泉水  
母波間遺鏡去潛龍潭底抱珠眠  
杵聲來雜溪聲響桂影要欺荷影圓

寄語隰川賢太守忍教勝景廢當年

懸崖儼若軒轅鏡  
千古人間照石泉  
清澈水光秋皎皎  
靜涵山影夜娟娟  
娥飛珮今何許  
老子登樓思惘然  
過客臨溪空嘆賞  
祇將詩律記流年

九日遊黑龍潭三首

王演

登臨何處思飄飄  
並海龍宮戴巨鰲  
鹽澤引風吹醉幘  
條山分翠助詩豪  
天容淡泊清眉目  
秋氣蕭森逼鬢毛  
徧地軍麾幾時息  
缺壺歌罷首頻搔



兩池鯨海關清漪四面雲山列翠微幸遇一年酬晚節  
况逢九日出晴暉杯啣秋露黃花老帽落西風白髮稀  
家隔兵塵歸不得眼穿丘隴淚空揮

忙裏偷閒遇四難不妨草草具杯盤望窮北闕三千里  
倚徧西風十二闌水落山容增古澹雨餘天氣凜清寒  
明年此會知何處醉撚黃花且盡歡

初出雲中

李溥光

吟鞭驢背穩如舟乍出巖塵眼界幽宿雨洗開千里嶂

晴雲捲出一天秋  
白鷗黃犢渾相識  
綠水青山揖舊遊  
莫訝旅懷還更好  
道人心上本無憂

登長嶺

鳥道盤雲上碧霄  
停驂俯視欲魂消  
苔花鎖石堆雲錦  
樹葉經霜剪絳綃  
雲物迷人遊汗漫  
山靈策我上扶搖  
馬頭殘日西風起  
萬壑秋聲送海潮

晉溪二首

小倉月

靈神金闕斗牛寒  
百谷雷霆吼石泉  
兩股春波楊柳月

一簾花影鷓鴣天  
神仙境界唐虞日  
錦繡江山汾晉川  
醉袖碧雲來著脚  
一聲樵笛古巖前

削桐宮殿古溪泉  
寰海聲高利濟全  
曉日僧鐘雲外寺  
晚山漁笛浪頭船  
三秋白鴈蘆花雪  
二月金鶯楊柳煙  
野老石橋驢背上  
人家村落錦屏前

羅漢寺

失名

莫把蒼霞擲拔開  
衣襟省得拂塵埃  
桃花隔水欲相就  
白鳥披烟能自來  
竹樹添新嗟事改  
河山依舊抱城迴

武靈未識家鄉趣却向邯鄲築好臺

羅漢寺

失名

聞思三昧屬僧家枕簟清泠漾翠霞不向風波爭世路  
自然雲水得生涯堦前綠竹東西徑門外紅塵富貴車  
午夢驚回鷗鷺散一聲漁笛隔蘆花

明

和梅之尹題紫團山二仙廟

杜 敷

樹壤川南翠屏下烟霞掩映古叢祠  
女流雙妹當年事

仙籍聯名或者疑紫府雲軒金鸞鷲瑤池宮闕碧琉璃  
有無茫昧忘言外祇在仙神聚散時

平陽譙樓四首

張昌

千尺飛樓駕厚坤憑高南望爽心魂窻前月露和杯吸  
簷畔星辰舉手捫雲影萬重迷上下角聲三弄警朝昏  
何時穩跨青鸞背直上天衢謁帝閭

朱甍畫棟砌烟霄千里提封入望遙冀北山川增壯觀  
河東城郭擅雄標八牕灑氣來蕭爽兩袖天風起次瀟

曾是玉皇香案吏欲將身世謝塵囂

太行晴翠滿層樓雄鎮東南數十州天下山川當脊背  
中原形勝屬襟喉何人雪路能高舉老我星軺記昔遊  
便欲乘風凌汗漫遠尋王烈問丹丘

崇樓西畔最怡顏此日官僚喜共攀一帶山河屏障裏  
萬家烟樹畫圖間乾坤到處堪清玩歲月何時得再閒  
醉拍闌干吟未歇夕陽孤鳥遠飛還

鹽池曉望

王翰

涿鹿城頭曙色分  
素池如練迥無塵  
翠屏倒浸山光淨  
銀漢橫鋪月色新  
五月南風凝雪甸  
四時飛鳥避雲津  
應須靜待調羹手  
擬共江梅入八珍

司空侍郎故居

西風策馬問王官  
松徑縈紆上百盤  
泉響夜潭穿石竇  
峰高天柱直聳雲端  
一鳴共許才華舊  
三詔方知節操寒  
花落鳥啼人不見  
休休亭上倚欄干

司馬斷碑

事業堂堂三代前可憐碑石幾多傳  
眉山手墨已無半哲廟宸書僅得全  
荒塚雨餘生直棘杏園春晚少啼鵑  
江南君到逢司馬為問渠孫若箇賢

秦樓

蕭蕭棟宇自明昌城郭人民半杳茫  
簾捲太行秋氣壯牕搖汾水素波光  
目窮白鳥天邊樹詩落青山雲外莊  
于此登臨送君去欄干留我倚斜陽

重遊栢塔有感



曾伴衰翁宿上方海榴樹下掛詩囊白雲隔洞迷雞犬  
翠竹摧梢失鳳凰靈籟聲回驚殿鐸雨花香滿散禪牀  
遠公化去誰同話月落空庭塔影長

過陽城祠

荆棘叢深隱壞垣半庭殘甃草芊芊餘生本擬成孤憤  
直諫雖伸已五年嶺徼風烟驚鵬鳥條山花木怨啼鶯  
當初只合終嘉遯謾費昌黎論一篇

望中條山懷道卿先生

雨洗烟嵐千萬岑，卜居真得古人心。  
黃金揮盡詩書富，白髮從生道義深。  
出處須因時顯晦，聲名不逐世浮沉。  
幾時聽雨蓬窻底，樽酒論文細細斟。

清明登瑤臺

百尺仙臺與客遊，和風吹面正輕柔。  
誰家修竹偏臨水，何處垂楊不映樓。  
緩步偶逢佳處歇，放懷莫厭醉時謳。  
君看巫谷橋中水，不斷年光日夜流。

瑤臺夜月

分題送閻  
知縣作

月滿珠宮露滿階  
鞭鸞羽客上瑤臺  
香浮明水仙壇靜  
雲散秋風桂殿開  
靈鶴有聲通碧嶂  
蟠桃留影印蒼苔  
想君他日蓬萊上  
應對清輝寄遠懷

巫咸河橋

陵谷誰知幾變遷  
市橋猶號古商賢  
紅塵閒看送車馬  
綠水靜聞流管絃  
萬古山川能尚質  
一時桃李自爭妍  
王家平父君當勉  
莫作臨歧一愴然

太谷葡萄酒

揉碎含霜黑水晶春波灩灩煖霞生甘漿細挹紅泉溜  
淺沫輕浮絳雪明金剪玉鈎新製法紫駝銀甕舊豪名  
客愁萬斛可消遣一斗涼州換未平

條山積雪

三日高眠閉小齋西山一望失樓臺傍岩松竹瓊林列  
當戶峰巒盡帳開青旂曉誇新酒出玉簑寒駕小舟來  
披衣開拓岩窓看原上鳴弓獵騎排

砥柱鳴瀾

一柱亭亭似削成，岩深雲冷古苔青。  
洄波浮沫雙輪轉，鉅浪漂山萬鼓鳴。  
鬼鑿尚留神禹跡，龍圖高拱帝虞靈。  
如今聖代當承瑞，直待何年始見清。

傳巖曉霽

雲過西山宿雨收，霏霏空翠撥雙眸。  
清流抱磴鳴砂磧，白露依林下蓼洲。  
野廟丹青從古寫，空山版築至今留。  
年年民庶思霖雨，猶向高岩祠下求。

箕山夕照

行盡箕山第幾重，亂峰高下夕陽紅。  
泥塗軒冕夔龍上，土木形骸鹿豕中。  
洗耳溪頭餘曉籟，棄瓢岩畔有寒松。  
自從避讓歸何處，一入烟霞更不逢。

閒田春色

歛衽重尋瓜瓞詩，二君被化聖明時。  
人心似日雲烟蔽，聖德如天草木知。  
風暖平原花發早，雨昏高樹鳥歸遲。  
如今猶有風流在，阡陌縱橫不忍犁。

虞城暮雨

凍雨森森萬竹齊，獨驅羸馬踏青泥。  
顛軫礮險垣墉護，畢軫城荒蔓草迷。  
井伯不忠宜作虜，百奚先去更知幾。  
徘徊欲問鄭門處，滿目西風禾黍低。

吳廟秋風

勾吳樹業向荆南，至德曾聞固讓三。  
永立武王原有道，受封虞仲更何慙。  
碑殘野火文全滅，樹響山風戰欲酣。  
禽鳥亦知亡國恨，何人啼斷入烟嵐。

茅津晚渡

夾岸春濤萬丈深  
喚船人立石岩陰  
棹聲歛乃連山應  
旗影悠揚隔水濱  
暮雨乍收山積翠  
夕陽倒射浪浮金  
南來北去人空老  
浩浩東流無古今

沙澗桃林

十里芳桃映曉霞  
一川紅雨點溪沙  
沙河浪暖漁舟出  
茅屋風輕酒旆斜  
陌上管絃多醉客  
林間雞犬有仙家  
此中疑是秦人種  
策杖尋源逐落花

虞城懷古



虞坂山深樹石蒼  
偶來弔古獨徬徨  
草生夜雨間田綠  
蓬斷秋風假道荒  
霸業千年慙詭譎  
忠臣一諫係存亡  
行人莫問空城宿  
拍枕河聲東去長

宮之奇廟

空山遺廟遠難尋  
斜入荒村一徑陰  
碧瓦落風蒼鼠去  
畫梁窺月訓狐吟  
巔軫兵入亾唇齒  
函谷臣歸去腹心  
若此貪昏何可諫  
知幾誰似五羊深

平陸城樓晚望

連日南風掃宿霾高樓獨上遣羈懷山圍晉國千峰合  
河壯秦關萬里來鴈帶斷雲歸極浦鴉鳴殘日下高崖  
茅津澗口人爭渡一片輕帆向晚開

春日山西寄王允原知司

并序

楊基

并州春半無花可賞追憶舊遊情動於中因賦長句  
五首公退之暇詠而味之庶幾春色之在目也允原  
知司善詠詩者就錄以贈

十里烟光濕翠苔二分春色到花朝無人快擊花奴鼓

有伴同吹弄玉簫徧地錦團歌處席滿身珠壓舊時腰  
莫嗔老子疏狂甚曾醉揚州廿四橋

藥苗初茁水生荳老麝收香鹿養茸二月春光纔霽雪  
一番花信又顛風參差鸚鵡全身白淺淡棠梨半面紅  
正是江南寒食近滿簾飛絮雨濛濛

畫船搖槳蕩晴波步障圍風踏軟莎簫鼓隊衝黃鳥散  
綺羅人比白鷗多不知酒與愁成敵長恨花為病作魔  
回首六橋青州徧水光山色近如何

花時無處不黃鸝，偏到垂楊著意啼。  
人立晚風携便面，馬臨春水惜障泥。  
踏歌趁拍催腔急，旋舞回身應節齊。  
遙想故山行樂地，紫苔侵徧十年題。

一莖白髮已堪嗟，况是東風兩鬢華。  
醉裏誤將裙作紙，老來羞以帽簪花。  
疎狂不識眉雙結，敏捷曾經手八叉。  
閒喜日長公館靜，自分新火試新茶。

太原春日郊行

屐齒車輪更馬蹄，綠莎隨處踏成蹊。  
無人為惜閒花落

有暇來聽好鳥啼  
步履愛沿流水曲  
襟懷高與衆山齊  
詩成誰復吹簫和  
却向藤蘿石上題

送路季琏問聘河東時東駕出師太原

三晉封疆拱帝圻  
兩河山色照戎衣  
青虹貫日隨星出  
赤鳥如雲夾電飛  
使者梅花春後折  
王孫芳草夢中歸  
入朝若問東南事  
積雪如山萬馬肥

過龍泉寺感舊

陳璧

石隙通流滴暗厓  
聲如神女墮瑤釵  
溶溶浸月搖金殿

曲曲流觴繞玉階  
遊妓濯塵淋舞袖  
主僧供爨濕禪鞋  
閒中記得當年事  
旋汲烹茶掃葉柴

題壁

顧登

綠髮相從今白頭  
百年世事幾沉浮  
秋風埜寺愁中醉  
春水湖船夢裏游  
知我故人惟子在  
似君高誼有誰儔  
開軒坐挹蛾眉秀  
奈此汾河不盡流

渡茅津

薛瑄

舟人催棹渡茅津  
南土重岡感慨頻  
昨日猶為故里客

今朝又作異鄉人  
風霜淒冷關河曉  
草木凋殘歲月新  
却愧傅岩操築老  
不應如我久征塵

謁傅岩祠

澗道重岡擁復迴  
秋風老樹古祠開  
帝庭大命抒宸令  
箕尾清光接上台  
欲奠市沽思麩蘖  
將羞時品憶鹽梅  
故知岩穴多奇士  
何自旁求到草萊

武侯廟

南陽躬稼到天民  
感激元因枉顧頻  
初識樓桑親帝胄

還如白水舊真人已從荆益開王業幾欲咸秦掃寇塵  
歷數雖窮遺廟在大名常與歲時新

乾坤不復有斯人間氣竒才絕等倫管樂規模雖並駕  
伊周事業可相親紅旗幾出袞斜道綠野還耕渭水濱  
時去千年猶廟食英風凜凜漢忠臣

題郭有道墓

幾經滄海變桑田高塚長留古道邊瑞鳳有時鳴曉日  
冥鴻終古沒秋煙關河迢遞膺舟隔江漢空茫雅信傳



千載有碑應不愧  
路人猶自識高賢

秋日家山雜咏

蕭蕭林壑動秋風  
獨立崇岡四望同  
九折河流皆禹迹  
千年疆宇總堯封  
龍門獻策文中子  
麟跡成書太史公  
搔首高人今遠矣  
斷雲滿目送征鴻

曲沃道中二首

孟秋雨霽過新田  
綠樹人家斷復連  
汾澮波光晴泛日  
絳喬山色曉參天  
申生大孝留天地  
里克遺名存簡編

何事齊姜墳上土，忍將芳草度流年。

四圍山抱一川平，新晉猶傳舊日名。  
汾隰漲消秋色淡，虎祁宮老夕陽明。  
歌傳烏鳥空遺恨，詩賦椒聊漫有情。  
往事無端何足問，且聽父老說秋成。

咏煤炭

于謙

鑿開混沌得烏金，歲蓄陽和意最深。  
爝火燃回春浩浩，洪爐照破夜沉沉。  
鼎彝元賴生成力，鐵石猶存死後心。  
但願蒼生俱飽煖，不辭辛苦出山林。

過孝義縣有感

茫茫煙樹遶孤城千古猶傳孝義名  
郭巨墓荒春草合比干臺古野烟生  
落花飛絮迷征旆剩水殘山惱客情  
鞍馬匆匆無限意不堪回首暮雲平

登星軹驛樓

驛樓高架與雲齊  
曉日登臨思不迷  
捲幕全無三伏暑  
凭闌轉覺衆山低  
閒花故句吟邊落  
野鳥偏于靜處啼  
十六年來成一夢  
後人誰為繼新題

西塢嶺

蕭然山館似僧房三尺寒檠一炷香  
風捲松濤清入夢  
窓涵月色冷侵牀  
倦來祇覺良宵短  
明發從教去路長  
但願兩藩民物阜不知何處是他鄉

余吾驛壁

行過禡亭望潞州  
四圍山色遠疑眸  
風塵滾滾迷官道  
煙霧茫茫罩客裘  
龍躍天池雲氣合  
雞鳴野店曙光浮  
停車暫宿余吾驛  
一夜無眠不到頭

過盤陀鎮

羣峰行盡是盤陀小徑紆迴亂石多風約間雲難作雨  
渠分流水不成河開門野店羣雞唱花發春山百鳥歌  
一段好懷無處著令人對景費吟哦

過韓侯祠

躡足危機擎子房將軍不解避鋒芒成功自合歸真主  
守土何須乞假王漢主規模應豁達蒯生籌策豈忠良  
荒墳埋骨腰山路駐馬令人一嘆傷

憶晉祠風景且以致望雨之意

懸甕山前景趣幽邑人云是小瀛洲羣峰環聳青螺髻  
合澗中分碧玉流出洞神龍和霧起凌波仙女弄珠遊  
願將一掬靈祠水散作甘霖徧九州

雲中即事

日擊烟沙草帶霜天寒歲暮景蒼茫  
炕頭熾炭燒黃鼠  
馬上彎弓射白狼  
百二連營秦壁壘五原分鎖漢封疆  
邊陲無事風塵淨坐聽笳聲送夕陽

大同克敵進封其鎮守總戎都督郭清寧為定襄  
伯喜而賦此以賀之

劉溥

捷書飛奏入明光  
邦伯榮封位定襄  
邊閫到今方得將  
野庭從此不稱王  
正愁白髮逢多難  
忽對青春喜欲狂  
却愧無緣走相賀  
典衣聊自醉壺觴

野史遺亭

祝顥

東風小隊出郊垆  
訪古因過野史亭  
衰草又隨春日綠  
好山偏向夕陽青  
百年國事存笥藁  
一代才華著典型

妙絕中州新樂府興來高唱有誰聽

雲中中秋有感

年富

南極烽烟又遠征衣冠今夕會邊城千家落日傷秋色  
萬里歸心對月明舞鏡彩鸞雲渺渺隔簾霜兔杵丁丁  
九霄風露涼如許欲挽天河洗甲兵

題元魏馮太后永固陵

雲中北顧是方山永固名陵閉玉顏艷骨已消黃壤下  
荒墳猶在翠微間春深岩畔花爭放秋盡祠前草自斑



欲弔孤魂何處問古碑零落水潺湲

退菴別業

邢讓

卜築西垣最可人青山為屋水為鄰身將隱矣文何用  
人不知之味更真自古交游少同志到頭聲利不關身  
清泉便可如澠酒澆盡胸中累劫塵

鎮樓秋爽

王越

瑟瑟西風吹雨晴可憐佳節在邊城百年人有幾時健  
一歲月惟今夜明撫劍不堪傷往事舉杯空自惜離情

君恩未報頭先白贏得轅門說老成

登鎮城西北樓

彩雲飛過幾層簷樓上人呼酒再添半壁夕陽紅影瘦  
一鈎山色翠眉纖我非能畫王摩詰誰是先憂范仲淹  
遙想滕王舊時閣瀟瀟暮雨掩珠簾

朔州道中大風

大塊茫茫噫氣多不知消息欲如何江東曾與周郎便  
沛上從勞漢祖歌平地有山皆走石半空無海亦翻波

合當送我雲霄上試把青天一洗磨

籌邊亭為韓都憲賦

丘濬

叢栢中間數仞亭海雲山月總闕情  
三干部下諸羌客  
十萬胸中老范兵談笑已看勛業就  
拍麾能使鬼神驚  
先憂後樂生平事  
早向凌雲書姓名

謁衛公祠二首

葉盛

曾於南廣拜靈祠青潞於今復見之  
血食固宜垂永世  
勛名何止冠當時  
聞花野草春風在  
枯木寒鴉夕照遲

亦有殘碑為西嶽摩娑不覺髻成絲

朝天經過衛公祠把酒匆匆一奠之冠冕方思為相日  
風神猶似出兵時犬戎劍掃功成早遼海師旋計用遲  
吟罷况當春日晚滿庭天棘蔓青絲

中臺擁翠峰

史鑑

上方樓閣聳竒觀金磬泠泠度翠巒深樹浮嵐晴帶雨  
陰崖積雪夏生寒鰲行罽屨星辰近雲氣氤氳宇宙寬  
何處紫簫吹落月不勝清思繞名端

五臺詠

懸崖削壁勢凌虛中有金仙遁跡居天近星河常掩映  
雲深草木自扶疎六時花雨含香落五夜神光帶月舒  
絕頂登臨飛鳥外一聲長嘯海天餘

題天龍洞

周經

山靈扶我看瑰竒直上崇巔拂古碑雲影低遮黃石洞  
泉聲清繞白龍祠隋朝寺紀開皇歲齊主宮存避暑基  
吟倚曲欄生慨嘆悠悠塵世幾興衰

喬太常宅夜別

李東陽

竹梧池館夜偏寒，促席行杯漏未闌。  
燕地雪霜連海嶠，漢家鐘鼓動長安。  
吟猿見月移孤樹，宿鴈驚人起別灘。  
二十逢君同躍馬，十年回首笑彈冠。

謁中鎮和韻

才寬

崢嶸絕頂不堪攀，天下瞻依有數山。  
上帝高居申玉宇，浮生何處覓玄關。  
地懸風雨雲霄外，路入星河咫尺間。  
吟賞自隨卿相後，翻愁車馬入塵寰。

登大同城樓

喬宇

東南山勢遶皇都西北樓高眺望孤  
荒磧平沙連塞遠  
片雲寒鴈入空無  
長城萬里早秦築  
文德千年仰舜敷  
今日北門誰鎖鑰  
受降城外畫輿圖

龍祠

兩堦丹繪敞簷楹  
親向龍宮勝處行  
入座花香侵酒氣  
隔溪人語亂泉聲  
極知濠上觀魚樂  
不減山陰會客情  
我欲乘風訪姑射  
射枯腸何日飯青精

過鴈門關

清泉細路入雲濤，鴈嶺重關勝百牢。  
千里川原開陣壘，三邊方鎮擁旄旄。  
天垂絕漠龍沙遠，煙鎖重城雉堞高。  
却憶雲中舊時守，塞田耕盡敵弦索。

秋風亭下泛舟

荒庭寥落野烟空，漢武雄才想像中。  
簫鼓應聲開畫鷁，帆檣飛影動晴虹。  
山分秦晉羣峰斷，水入河汾兩派通。  
少壯幾時還老大，不須回首歎秋風。



西溪靈井

千仞靈淵鬼鑿開，真從一竅洩胚胎。  
蛟龍石底能潛現，霖雨寰中任往來。  
地界遠分梁子國，山形高枕趙王臺。  
西溪勝蹟堪留詠，徙倚蒼松坐碧苔。

歲山廟

兩崖雲起澗西東，廟貌長存烈士風。  
仇國遺墟秋艸碧，晉山殘黛晚霞紅。  
存孤事重功何偉，食報恩深祀不窮。  
况有英靈彰歲禱，高名千古播寰中。

固關

道旁松火映溪紅，夜度層關月正中。  
老興豈緣橫槩在，少年誰與棄繻同。  
河山表裏連三晉，燕趙襟喉控七雄。  
聖代乾坤皆一統，詩書何地不帡幪。

過固關教場

壇下貔貅擁鐵衣，陣前魚鳥列戎機。  
京營習戰時三閱，畿衛分番歲一歸。  
共道聖謨非黷武，元知軍事本防微。  
遙聞玉輦猶巡幸，邊塞應無羽檄飛。

瀑布泉二首

翠巖懸溜俯溪干，背疊冰花雲未殘。  
石乳香飈雲液潤，珠簾光映水晶寒。  
濯清應取塵無染，飲淡元知性所安。  
焉得結茅常近此，杖藜携酒日相看。

岡頭形勝接綿山，為愛懸泉數往還。  
石乳下通滄海底，浪花高疊翠峰間。  
千尋岫嶽留仙蹟，一掬清泠解病顏。  
四十年來羈俗駕，水邊贏得老來閒。

老君堂

洞門高挹綿川勝杖履重來歲屢更雲淨九霄看月色  
風迴千嶂聽松聲山人解送淵明酒羽客能吹子晉笙  
三十六天知遠近仙蹤吾欲訪寰瀛

張果老洞二首

洞門高掩十三天千丈雲梯上下連祇為名山長覽勝  
却如平地可登仙石幢經古重題字丹竈灰存不記年  
綿水承天皆洞府崆峒須問廣成篇

翠微仙洞接嵯峨石牖平開映薜蘿沙水有痕懸疊浪

海田無變結盤渦從知天巧非雕刻定藉神功與護呵  
願得壺中留日月采真長和白雲歌

水簾洞

石圍沙堰綠渠開萬斛泉源出地來引岸田園資灌溉  
傍山林壑映滌洄蘭亭暫擬流觴去汾水還思鼓棹迴  
共說仙蹤多古洞猶聞夜夜響風雷

觀綿水

西嶺寒流繞澗斜離離石子帶晴沙窮源不覺緣溪遠

覽勝何妨問路差  
松塢盡時還列柵  
桃源深處可移家  
臨風翻出清商調  
漫把湘絃聽伯牙

飲甕山東澗泉

泠泠一勺淨塵心  
絕愛幽泉出澗潄  
敢謂微涓裨海渤  
祇宜清賞助雲林  
光分蟠螭涵空遠  
湍激珊瑚插地深  
欲聽瀟湘水雲曲  
朱絃何處訪知音

蒙山煙雨

俯瞰荒原一掌中  
亂山迢遞走西東  
路盤絕頂羊腸險

勢壓層城虎踞雄  
冉冉輕烟浮遠碧  
霏霏零雨下空濛  
高虛合是神靈地  
父老年年祀禮同

沾水拖藍

一派漣漪出遠嵐  
山光雲影共拖藍  
春深欲染雲衣淨  
夜久微將月鏡涵  
清別涇流同渭水  
碧分江派比湘潭  
舊時縣治今何在  
雉堞茫茫野草甍

古寺園林

松嶺南連鐵佛東  
園林深擁梵王宮  
寒霜不入空門界

靈氣常浮法相中  
花曉客來鐘啟戶  
月明僧語雀驚叢  
金山玉帶誰相贈  
却笑機鋒我未通

洪水池塘

白雲芳草寺門前  
舊斲寒塘定幾年  
靈液有春長浸地  
碧泓無影遠涵天  
居存劫火迷空界  
路失仙源化福田  
多病不禁塵土甚  
更於何處問溫泉

石馬寒雲

沾嶺南來是此峰  
峰頭雲氣護寒冬  
天低遠岫林俱暝



日墮陰崖雪半封，千古按圖空作馬。萬年為瑞合從龍，  
因占趙地如牛象。一統河山豈易逢。

昔陽花木

三千花界路茫茫，異種人傳自昔陽。春入錦幃分五色，  
香翻羅袖引成行。嬌容笑日如傾國，妙舞隨風各擅場。  
誰向洛陽誇獨盛，舊時臺榭已荒涼。

松峰積雪

路繞危峰不易登，萬松盤巨石峻增。深巖慣積三冬雪，

陰谷猶餘六月冰  
寒結頽雲飛不起  
凍穿垂溜濕還凝  
朝來困暑心如渴  
欲藉冷滾散鬱蒸

皋落奇峰

龍從峰勢出雲中  
皋落城荒舊堞空  
上黨地分西晉險  
太行山據北方雄  
曾知勝蹟鍾靈氣  
可是奇形入化工  
回首故園剛數里  
放歌懷古意何窮

鳳凰山

霜樹驚颺亂葉飛  
北山幽迳路霏微  
力辭鈞鼎章頻上

心切雲林詔許歸  
四座黃花酬令節  
千巖翠靄映斜暉  
登臨處處堪行樂  
西華陳搏早拂衣

神掌窠

沙磴西來樹草幽  
采真端為碧山遊  
巖坳恠石亭亭立  
澗口鳴泉泱泱流  
晴日况非三不出  
晚年偏得四宜休  
煙霞夢覺尋詩處  
醉搦霜毫縱遠眸

蒙山

雨過花香落澗泥  
遠尋樵徑記還迷  
吟躋絕巘開蒼霧

笑倚危槎拂翠霓  
下界俯看千壑迥  
半空遙指萬山低  
紛紛塵世何為者  
忙逐昏鴉共曉雞

遊蒙山次郭伯瞻韻

澗谷盤迴帶峩峩  
直從飛磴跨蒼旻  
雲驅野色千駿馬  
峰疊晴光萬角麟  
雄飲詎知樽有盡  
捷才誰說句無神  
鏡湖一曲皆君賜  
高尚何如賀季真

沾山

繞溪蘭芷伴鷗鳧  
沾嶺重來夢寐俱  
上黨舊傳分野志

清漳新閱濬川圖  
濯纓調古三秋和  
乘楫功高萬世須  
山畔羣山多恠石  
何人重向海東驅

仙人硤

絕澗山橋第一硤  
兩崖峰勢突高空  
雲根塞洞稀人跡  
石竅通天詫鬼工  
一注幽泉鳴浙瀝  
九華靈樹鬱菁葱  
山鄉勝蹟多如許  
可是登臨一老翁

沾嶺觀清漳

鰲峰千疊到平林  
突出招提擁翠岑  
花雨夜空天水色

松風時送海潮音  
山中芳艸春長換  
世上紅塵老不侵  
却笑禪棲非我事  
謝公餘興在登臨

陡泉山

石磴參差路頗艱  
女郎祠在翠微間  
攀林絕巘清秋迥  
萬壑空山白晝閒  
仙駕鹿駢常濯濯  
靈泓泉響自潺潺  
一鄉勝蹟堪留咏  
高視乾坤豁醉顏

我尖山

東嶠尋真興未厭  
振衣還上北峰尖  
曾知物外閒行好

敢謂寰中樂事兼紅葉繞林秋欲變蒼霞滿地歲將淹  
飛揚心擬崑崙望得句時時一撚髯

石尖山

遺世高情老不厭東西踏徧兩峩尖名山百里覽應盡  
勝具幾人能許兼西隴詩材尋李白南州賦手夢江淹  
華巾鶴氅無拘束坐愛臨風拂醉髯

秦山

嫩黃柔綠點園英始信東風不世情行處好山容我隱

釀來新酒為君傾  
穿溪決決看冰泮  
出谷嚶嚶聽鳥鳴  
獨念郊原方憫旱  
何時霖雨慰蒼生

松子嶺別王虎谷

路繞千岩一蓋行  
采風無慰故人情  
詩名久駕唐錢起  
賦體爭傳漢馬卿  
道在乾坤煩拍授  
事關今古費商評  
片時陰晦愁休劇  
佇看雲開萬里晴

重嶺

路入青冥有洞天  
土花雲壘不知年  
閒心暫向此中定



勝事空於方外傳，淺水苔痕驚過鹿。  
幽林樹影聽鳴蟬，題詩却憶王摩詰。  
圖畫何須詫輞川。

鶴度嶺

丹梯平步立青霄，列席崔嵬酒易消。  
萬象俯看堆衆皴，九霄高擁散羣鷲。  
雲根狀類浮圖迥，石乳香隨沆瀣遙。  
更指西南佳勝處，太行空翠接中條。

錦繡峰

籃輿到處且夷猶，意在看山豈好遊。  
被盡烟霞輕綺服，

飽餘丘壑厭珍羞人言勝具誰能及我訝豪吟老未休  
踏盡太行三百里化工隨地有丹丘

嶂石岩

踏盡林巒千萬重日斜溪寺響疏鐘  
舊遊翻笑入山淺佳興非緣對酒濃  
天接太行多爽氣雲開皋落見奇峰  
巉岩巨壁高千丈欲究鴻濛鬼斧蹤

清漳水

海經泉品載清漳親取靈淵一勺嘗  
玄圃未傳滄玉法

滄浪先聽濯纓章源分渭水秦天遠派入湘流楚地長  
欲借鳴琴翻雅調空山猿鶴應宮商

武安王祠

藻旒簷楹敞殿庭古來神將幾圖形吞吳會見江濤小  
興漢安知國祚零三晉河山傳氣概八荒霖雨布威靈  
樂平况是鄉邦地頌美須鑿石上銘

三郎祠

岱嶽分祠出縣東山川環繞據高空神名誰紀三郎異

鄉俗爭傳百姓同，賸有風雲驅歲疫。固宜香火祝年豐，  
勤詩聊爾酬靈貺。曾夢竒方授病中。

狐突祠

晉家爭立釁，誰開霸業中。哀未可迴，諸子為君從。患難  
當時謀國總，賢才丹青遺像忠。魂在香火空山祀，典來  
自古英雄常死節，不須重起後人哀。

水神祠

開盡林霏遠，眺明翠微深。處有泉聲斜穿澗，艸孤村出。

俯映溪田十里平勝地合教神作主舊祠猶記水為名  
吾家正與西峰接祇少滄浪一段清

臺泉寺

北尋蘭若路逶迤左右峰巒夾兩顛燕汚袈裟僧定後  
龍收烟霧客歸時旌幢舊塔三生供香火空山百代遺  
笑我晚年方一到旋披蒼蘚為留詩

南塆頭寺

巨嶺羊腸曲曲行千岩空翠濕衣輕花宮獨占茲山勝

苔碣猶傳異代名地迴星辰當戶轉林疏雲霧隔牕生  
炎曦正午悠然坐識得空門任夏情

重興寺二首

石殿高寒敞不扃畫簷疏響度風鈴烟橫薄暮千峰紫  
雨落荒郊百草青花氣入簾詩句得松聲驚枕夢魂醒  
禪房寂寂更深後猶有山僧夜誦經

綠樹蒼蒼帶暝烟坐來山雨思冷然諸廊繞砌疑無地  
一刹臨崖別有天石迴靜聞殘溜下塢深時見懶雲眠

真成杜老龍門宿却笑塵心未悟禪

園林寺

逶迤石徑逐溪行說著登臨便有情出壑疏松含曉翠  
隔花啼鳥試春聲山深車馬應稀跡寺古園林剩得名  
村老道旁休跪送向來吾已謝冠纓

石門寺

山為屏障石為門中有招提數畝園霞嶺南通仙客觀  
桃居東接里人村田荒租稅貧能辦殿古焚修業尚存

童州經過今白首相逢老衲與重論

趙壁寺

百尺臺空磴繞雲殿門香氣挹清薰幽僧病縮青藜杖  
豪客閒書白練裙花遠磬聲經午歇山深林響入秋聞  
吟鞦莫訝遲歸去寶地靈蹤與世分

玉泉寺

蘭若泉開錫杖飛山僧多具木綿衣琮琤石罅鳴春漏  
藻繪珠林炫晝輝空界塵消花品淨陽坡地暖葯苗肥



幽居却愛逝禪意盡日間吟未肯歸

石馬寺

雲深山徑失西東近遠川原霧靄中天接空門塵不到  
雲生古洞氣還通竒遊頗解坡仙樂遐想猶存謝傅風  
欲向禪堂求悟水誰將浴具焙薰籠

沾嶺壽聖寺

沾麓禪宮似少林左環青翠右丹岑空堦暖霧薰花氣  
香殿微風引梵音枕上藤蘿堪自樂城中租稅免相侵

懸車已遂看山興一歲須教一度臨

題中鎮廟古松

青幢紛映海霞紅  
屈鐵高枝盡向東  
疑合蛟龍垂澗雨  
愛聞笙籟響天風  
層雲上麗鸞應宿厚  
土中盤草自豐  
况是神明扶正直  
茯苓千歲問長終

霍嶽

翠岑丹壁費躋攀  
冀域當為第一山  
千古巨鰲扛地軸  
九霄玄豹托天關  
河汾俯視灣環外  
嵩華平臨伯仲間

共祝豐年答神貺春來霖雨徧區寰

遊冠山

王瓊

冠山突兀峙城西晚傲多時思轉迷儼與榆關增壯觀  
故為高士作幽棲緬懷先哲尋遺址徧拂雕牆覓舊題  
最愛老僧無箇事溪邊閒洗種花泥

經太安驛

馬頭疏雨共輕烟秋色冥冥草樹連世事百年如蟻鬪  
化機終日擬丸旋昌黎學術能扶主裴度功名解備邊

自歎斯文當後進敢將踪跡問前賢

墨磴遇雨飲李進士莊

王雲鳳

笑傲深村掛薜蘿西來雲氣忽滂沱當牕翠竹無妨坐  
把酒青山欲放歌閉戶經年何所事杖藜今日此中過  
英雄莫負經時手老我功名志已磨

合山竒泉

懿濟聖母四月  
四日誕辰故云

四月清和雨霽時來攜父老拜神祠簷前燕雀多新壘  
橋畔松楸只故枝環抱東西南壁合周迴三十六峰竒

靈泉突兀經今古旋渴旋流誰使為

書隴州故關巡檢司壁

先祖贈大司農公諱  
義成化二年任此

泉聲樹色擁行車問到關頭無主家故事尚傳當日叟  
近年初改舊時衙前山鸚鵡何言語別院梧桐幾歲華  
塚上有松今已拱不堪揮淚夕陽斜

玉峰山偶題

韓文

不到仙家十五年可人風景尚依然半岩花語龍歸洞  
滿地松雲鶴避烟近水丹崖常得月凌空畫閣欲參天

賞懷未了登臨興歸騎斜陽懶著鞭

鼓堆

楊一清

躡磴迴岡幽復幽陵晨颯爽類新秋背岩茅屋烟初動  
過雨沙田秫自稠雙竇飛泉珠氣合十章巍樹翠雲浮  
清狂謝朓仍豪興竟日追陪高適遊

臨汾懷古

王好問

河山寂寞古原空劍璽消沉漢業終簫鼓只今惟逝水  
樓船不見自秋風征鴻影沒浮雲外寒杵聲微遠樹中

無那興亡起惆悵夕陽衰草恨何窮

武侯廟

王 紱

忠義分明兩出師令人讀罷想當時躬耕本亦巢由志  
襟抱聊將管樂期魚水一時心已愜風雲八陣石難移  
長星不使營前墜禮樂重興未可知

送胡良弼太守還雲中

劉 龍

屈指元州十五春曾於公署挹清塵一燈深夜花頻落  
兩履新晴草未勻此日潁川堪入傳當時工部已驚人

莫辭更踏關山月會有徵書下紫宸

星軺驛和于少保韻

太行不與衆山齊萬壑千岩入望迷未暇日邊論遠近  
只從天下定高低旌旗影拂閒雲度鼓吹聲兼好鳥啼  
少保經行今幾載細磨碑藓認留題

狼車村謁孔廟

孔轍曾聞返太行周流原未到吾鄉犢誅早已聞河上  
鼠立空傳在道傍賴有山河雄表裏更憑風俗擅虞唐



今逢四海同文日古廟丹青自夕陽

國士橋懷古

六卿分晉歲華遙古跡猶存國士橋  
流水落花愁尚在夕陽衰草恨難消  
伯夷恥食周王粟仲父還登小白朝  
萬古人心此忠義汗青留取姓名標

漳江春渡

水在邑城東環抱而流春時清淺可渡河東村落往來城市渡者甚衆

漳水南來抱邑城春風淡蕩雨初晴  
樹藏茅屋諸村近橋接苔磯獨木成  
舉網有時逢巨口烹茶隨處汲深清

詩人不盡尋芳興，幾度滄浪詠濯纓。

韓山獨秀

韓山在邑城北，有峰秀出諸山之表，鬱然陰森，暑中望之，輒有寒色。

高山城北聳竒觀，五月遊人怯曉寒。  
古木陰森迷歲月，浮雲重疊擁峰巒。  
半空仙梵藏幽寺，百丈泉紳瀉碧湍。  
焉得思如摩詰手，細將形勝寫毫端。

仙堂舊隱

仙堂山在邑城東北，舊傳有修真之士，隱居于此，後以仙去，今古寺猶存。

高士當年不可求，白雲無恙水長流。  
桃源路杳應難問，蓬島春深是勝遊。  
已分烟霞成痼疾，肯將霖雨慰深憂。

蒼松翠栢遮天日獨傲人間萬戶侯

涼樓勝觀

元將戍兵于此嘗起樓避暑後人因為廟祀之每二月勝會遠近咸集

聞道前朝避暑樓林塘五月已驚秋千村樹色高低出  
四面嵐光遠近浮世代暗催人老去繁華都逐水東流  
空餘廟古丹青在簫鼓春風擁道周

獅山晚照

邑西有九流山有峰聳出如獅子狀夕陽返照宛有生態真偉觀也

百戰威雄未有獅山形相似更為竒來從異域行應倦  
卧向中原去却遲萬古風雲常守護千林虎豹盡驚疑

夕陽返照渾如畫此景真成造物私

寶峰晴雪

紫岩山有古寺曰寶峰與晉虎祁宮址相近雪霽紫氣輝映景尤明麗

招提西望鬱崔嵬雪後俄逢霽景開杖月老僧歸玉宇  
隨風清梵下瑤臺氤氳瑞氣催詩句豔歛晴光入酒杯  
咫尺虎祁遺址在幾番登眺重徘徊

甘泉漱玉

城西有甘泉村甘泉湧出瑤瑤然若玉佩之聲最為甘美可愛

滾滾源頭漱玉泉烟村西畔石橋邊應隨碧澗浮鷗鷺  
不與紅塵競管絃長夜園林添秀潤暮春童冠鬪清便

為霖會待風雲起真與蒼生解倒懸

王晉溪太宰卜築於晉祠水邊甚為佳勝乃自綏  
德謫所以書來乞詩自謂兒輩近為我營一佚  
老之所池館之間賸植花竹稻畦滿沚烟汀雪  
瀨彌漫極目頗得秀潤閒雅之趣乃疊韻以四  
律復之

晉水溪頭冢宰家獨將風物占年華  
舟航利涉空橫渡霖雨功成不受誇  
千頃雪翻彭澤稻一川霞散洛陽花

何當起作天河水再為蒼生洗怨嗟

幾時投刺晉公家遙望龍門髮已華表裏河山空入夢  
神仙池館漫多誇門前鷗鷺尋常客鏡裏菱荷次第花  
是說白頭猶紮塞中原懸望四夷嗟

故鄉門第是通家京國交遊有歲華宴罷更留常至醉  
詩成頻讀誤蒙誇秦關夜月三年笛渭水春風幾度花  
何日與公更秉燭側身西望轉長嗟

晉溪原是大方家潤色皇猷國有華十策河汾從古重

一篇滕閣至今誇地靈慣產庭前玉天巧能開筆上花  
為報故園歌舞地便看旌旆莫興嗟

遊寶峰寺

攜酒尋芳入翠微醉中乘興却忘歸山川有約專相待  
歲月無情欲似飛村市遠張楊柳幕柴門斜掛薜蘿衣  
江湖廊廟平生事憂樂關心總不違

寺下清溪碧玉流寺前高閣紫烟浮鶯聲似逐韶光老  
花事閒生客子愁上黨地靈雄宇宙虜祁宮古屬春秋

遙看蘭若斜陽外不惜捫蘿到上頭

幾年遊徧江南寺北望江山憶寶峰千仞紫岩金豔豔  
一溪潭水玉溶溶登臨陟覺風雲集唱和多勞故黨從  
投老忘機隨去住得於雲境寄塵蹤

紫石為岩寶作基凌霄千仞重華夷地當衝要山偏好  
寺占清幽水自竒訪勝欲追滕閣記留題疑是輞川詩  
不應地主歸來晚惱得春風拂鬢絲

一春長苦雨霏微雨霽尋春春欲歸葉底幾聲山鳥美



風前無數野花飛，觴傳流水頻移榻。  
杖倚高岡獨振衣，林下無人真謾語。  
閒情久與世相違。

塵纓暫解濯漳流，寶刹樓臺上下浮。  
玉勒同遊真可樂，金樽長滿復何愁。  
沙汀睡鴨將臨夏，麥隴藏鴉定有秋。  
四十年來重到此，旁人應笑雪盈頭。

寶峰寺在紫岩頂，知是蓬萊第一峰。  
殿古栢叢風瑟瑟，庭空花影月溶溶。  
韶華付與閒身管，樂事應教造物從。  
欲向江南問消息，幾人遊賞繼吾蹤。

寄王內泉曲莊

文徵明

五原南下勢迴環，汾晉風烟萃此間。  
見說名園依綠水，還聞別墅占青山。  
春風把酒隨花發，落日凭欄任鳥還。  
陰茂濯清幽興足，儘輸高士百年閒。

南峪雨後取道上五臺

陸深

六月蕭然似晚秋，登高重整木綿裘。  
即看滿澗泉初出，知是前岩雨乍收。  
碧嶂旋隨孤鳥沒，白雲長傍古松留。  
幽芳一路無人采，何處三山更十洲。

入臺

山水情多不自由  
白頭終作五臺遊  
萬重雲樹高低出  
千里滹沱背面流  
絕頂祇疑天北極  
朝陽初見海東頭  
共傳此是清涼地  
為洗煩心盡日留

遊五臺

五雲常覆五臺端  
天近清都特地寒  
澗道千年冰未化  
林梢一夜雨初乾  
黃河紫塞依依見  
碧殿朱樓面面看  
萬壑千岩青未了  
更從高處望長安

宿顯通寺

一榻空齋卧白雲青燈微雨夜初分無緣十日慚凡骨  
有夢三台繞聖君別院雞催山月吐迴廊魚咽澗風聞  
青山亦是人間世自覺悠然隔世氛

竹林寺擬宿

未有長歌行路難青山最愛雨中看圖書暫許淹塵榻  
蔬蕨先教具午飡碧樹洗空千澗出白雲封滿萬松寒  
天留再宿清涼地明日溪南十八盤

清涼口

炙手薰心事已多  
曉涼來撫石盤陀  
不爭可受千人坐  
無事應須百遍過  
初日射林光  
歷亂懶雲將雨濕  
峩峩夜深或有騎牛到  
堪和南山扣角歌

高嶺書院

石梯隨步與雲升  
又是青山第幾層  
望到只疑天更近  
興來惟有斗堪憑  
嶺頭日日開昏曉  
洞口詩書感廢興  
一自文翁歸蜀後  
手扶風教有誰能

出使雲中作

李夢陽

黃河水繞漢邊牆  
河上秋風鴈幾行  
客子過壕追野馬  
將軍韜箭射天狼  
黃塵古渡迷飛輓  
白月橫空冷戰場  
聞道朔方多勇畧  
只今誰是郭汾陽

聞官軍破青羊山賊志喜二首

狂賊憑陵起潞城  
直勞宵旰遣天兵  
健兒淇上元難敵  
猛士偏頭舊擅名  
三路夾攻師已捷  
兩藩休息恨初平  
南行老我還高枕  
桑梓春風草木生

捷音馳報九重城一日河山頓解兵地險始知攻有策  
王師誰道出無名廟堂憂可寬西顧問里歡應頌太平  
聞報正逢開盛宴衰顏帶酒欲春生

夏都諫勘鄴潞之戰惠見憶之作寄答

廿年不入紫宸朝白髮猶能伴野樵敢向驂騑爭道路  
固知鵬鷲自雲霄狂歌見月時呼酒懶性臨風欲棄瓢  
寄與昔遊青瑣客嶺雲溪雪記同招

焚草常懷杜拾遺從容退食梧垣遲人當名世汝其輩

國有中興今固時衰年丘園合潦倒大業竹帛能留垂  
迢迢故人心在日日苦吟雙鬢知

侍臣斧鉞雲中下山寨冰霜戰後行穿腦乍攀黎賊路  
石門重覽鄂王營中興崖石元留頌成算朝廷敢論兵  
試向絕巔看大海年來波為聖人平

岩堯上黨接壺關杖鉞冬行歷萬山巖凍雪埋擒虎窟  
窟腥雲芻斫龍灣嶰嶼路透漁樵入蒼蔚林清鳥雀還  
為問登高能賦者霜毫幾掃白雲間



吉州道中

楊文卿

傍崖桑棗未成林  
障日峰巒每送陰  
石解鉤衣緣有角  
雲能礙日豈無心  
笙簫韻落清溪淺  
蹊逕香迷宿草深  
到處驚魂常戒險  
偶然適意便成吟

陽城南望

馬汝驥

析城王屋萬峰巒  
直接仙人白石壇  
古洞風雲搖錦障  
名岩日月抱金丹  
帶分河濟懸相映  
襟合嵩邙鬱自盤  
不得探竒揮短賦  
徒懷卜勝挂高冠

登河東書院書樓和韻二首

呂柟

謫宦條陰借地幽，西風暮雨日登樓。  
慢披黃卷懷玄晏，忽對青山欲白頭。  
石樹猶新霜後葉，山禽久報院中秋。  
當年建置心何壯，地是虞鄉與夏州。

離城十里地清幽，南對中條起玉樓。  
墳典以來俱頓足，海山何處可尋頭。  
日斜仄徑緣新雪花，暗東籬感舊秋。  
此計讀書鬚半白，無材猶愧佐名州。

謁諫議大夫陽公祠

陳鳳梧

遺像堂堂拜亢宗千年諫議尚休風山川舊隱絃歌地  
松栢新圍俎豆宮忠孝諸生明有訓催科百姓獨無功  
道州亦有遺祠在南北瞻依兩度同

謁傅岩祠二首

中條山麓大河陽商相巍巍有寢堂一代良臣真帝賚  
三年思道本謙光已紓霖雨蒼生望尚憶鹽梅鼎鼐香  
治學兩篇垂訓典直將遺緒接虞唐

晚風秋雨濕征衫下馬祠前謁傅岳版築一時留隱迹

尾箕千古仰臺榭明良相感應非偶賢聖初興自不凡  
何日重來瞻貌像欲將歲月紀巉岩

沙市監鎮司馬公

夢求

劉麟瑞

荆水滔滔百尺渾邈來淺縮漫潺湲木城聯岸風輪吼  
沙磧屯雲火炬燔效死小臣懷綠綬偷生大閭媿朱轡  
下官名姓君知否涑水先生七世孫

元遺山

党承志

元子文章足壯觀不教簪筆在金鑾憂來劉向歸休早

老去馮唐際會難  
野史亭荒無瓦礫  
中州集在重琅玕  
先生有句猶能道  
盛世何曾有裨官

河中形勝

楊博

秦晉相望雞犬聞  
黃河一派就中分  
西連仙掌明初日  
北接龍門起暮雲  
五老峰前猿自語  
二賢祠畔鹿為羣  
琴堂故跡依然在  
千古高風仰舜薰

稷山

喻時

飛沙凌亂撲征帷  
朔氣遙連白虎旗  
水急漁船留凍浦

山空獵網掛寒籬  
觀風只到義和塚  
訪古還過后稷祠  
聞說單于侵內郡  
將星不見使人悲

青石槽

秋風虞坂小蓬萊  
汗漫清魂飛九垓  
孤勢却成三晉險  
削痕爭道五丁開  
路從缺嶼連如斷  
人在迴崖去若來  
魏豹城南渾漫興  
巫咸臺頂白雲堆

坐見闕樓對中條山漫述

小樓斜日已高春  
坐對條山寶氣重  
白霧遠迷金粟洞

層雲平起玉霄峰唐虞城闕連青靄秦晉池臺沒紫茸  
安得仙人九節杖飛凌絕頂拾芙蓉

雪晴瞰瑞亭

掃雪探春入洞天蓬萊佳處碧雲懸珠林光射七星石  
玉澗聲飛五色泉鳥近遊人過別嶼猿依樵子嘯平阡  
塵勞偷得須臾暇溟海空思鶴上仙

謁北嶽廟

王世貞

祠壇縹緲遏雲孤  
肱蠻英靈颯有無  
象應星辰天北極

氣蟠龍虎帝神都  
羞從禪代論金檢  
喜向侯邦乞寶符  
混闢將何酬聖主  
祁連不遣祭休屠

送周郎中守大同

誰言春色漢關窮  
漢使乘春有畫熊  
為問馮唐淹省署  
何如魏尚守雲中  
嚴城月靜千烽出  
嘯閣風迴萬馬空  
保障自來明主意  
不須長劍掃崆峒

送張比部募兵山西

九月連烽愁太陰  
徵兵六傳漢臣臨  
軍中蕩子隨都尉



塞上孤兒備羽林豹帳雲鈴揮白羽虎符星檄散黃金  
自來三晉多豪傑投筆知君萬里心

晉陽貢院試士作呈侍御饒公三首

萬古人文禹甸開千山梗杞建章材騰空雨挾龍門上  
躡景風從馬邑來彩筆祇應推晉問黃金端不讓燕臺  
共稱公子賢多客卓犖誰當五士才

戟門秋敞集名流決策爭先第一籌地有飛黃空冀北  
天將東壁應并州千門綺月機初就百筐丸霜繭暗抽

十五鄉書俱造士可無車馬錫諸侯

棘堂清峻逼雲霞萬戶蜂歸靜不譁  
晝永角聲催具草夜闌燈灺生花  
河東豈必無三鳳綿上寧容有一蛇  
聞道建賢今識玉連城須向國工誇

九日登鎮樓小宴

晉陽風色更重陽閣頰千巖萬木蒼  
白鴈不傳南國信黃花偏作後時香  
衰顛倚帽難從落獨客傳萸轉自傷  
莫使牛山笑人在一尊聊學少年狂

望五臺山初雪

夜盡千峰紫更玄  
雪山俄覺曙來先  
青獅坐改文殊地  
玉竦橋橫大梵天  
會見九邊消戰色  
已從三晉兆豐年  
停鞭詫有陽春在  
無奈王猷興黯然

娘子關有泉穿大窟下勢雄甚味冽而甘  
迓冬不冰居人賴之

飛泉中瀉九關開  
朔氣偏催萬窟雷  
噴玉高從西極下  
擘崖雄自巨靈來  
地輸神漢為湯沐  
石拂鈞天奏帝臺

若語會心翻自笑羽書初過黑龍堆

入太行遇風雨回望中原即景有述

百盤天益孟門雄趙魏山川指掌中一柱雨繚穿落日  
千岩雲脚斷迴風黃龍倒挾河流上白馬俄驚練影空  
自是壯游尊馭在不將愁向阮車窮

將入黃榆度水門峽最逶迤險絕處也

峰排瀑掛峽垂傾日薄烟霏徑自生破險旌旗俄滅沒  
出幽天地頓崢嶸源桃欲問秦人隱細柳先屯漢將營

慷慨不堪頻指點帝京南去是長城

榆嶺峭壁際天中有懸泉如柱玉下滙巨澗

飛泉坼漢瀉崔嵬倦馬驚逢首重回絕壁倒看銀綆墜  
高空橫散玉繩來闕竒汗雪長凌夏峽急崩雲自起雷  
一酌吾寧遜潁客即看汝豈住山才

登黃榆最高處一首

太行無際碧天愁榆塞寒帷萬古收紫氣東盤滄海出  
黃河西抱漢關流縈韃忽動雙鴻暝刁斗頻敲萬馬秋

漢代到今仍列戍教人無賴說并州

托御當年惜未同叱車今旦指秋空千峰競吐峩峩日  
萬木長交慘淡風滴博高疑唐舊戍虎祁遠是晉新宮  
亦知雷雨非全始不遣人間句並雄

登馬嶺關口

迴崖宛轉異晴昏片白浮空列戍尊一線地排為北戒  
雙輪天捧作中原蘋端噫氣千崖拆木杪蒸雲萬古屯  
我欲著書從此逝毋煩令尹候關門

登伏牛關

謝榛

伏牛形勝鬱嶙峋  
二月風光客興新  
半嶺夕陽惟照雪  
千松寒色不知春  
天連山勢全雄晉  
地轉河流遠界秦  
寄語關中幾遊宦  
虞卿祇是著書人

王屋道中

勝克河中號令齊  
神兵入自太行西  
昏昏烟鎖天壇暗  
漠漠雲埋王屋低  
風軟却教冰泛水  
寒輕還使雪成泥  
行吟想像覃懷景  
多少梅花坼玉溪

望雲中塞

幾年欲向塞門遊  
北度桑乾重旅愁  
畫角悲涼孤館夜  
黃榆搖落九邊秋  
壯心未擲班生筆  
浪迹堪憐季子裘  
回首江湖任鷗鳥  
漫嗟華髮滯燕州

汾陰祠懷古

張四維

睢原廟宇枕汾涯  
想像前朝駐翠華  
不見龍旂屯檜栢  
尚餘龜碣卧塵沙  
野人采藻祠春燕  
漁子鳴榔起暮鴉  
今古山河千里目  
高樓吟望對明霞



游靈泉寺

王國光

西來為訪密公廬錫杖遙飛定此居  
虎卧萬松幽徑入  
鶴盤雙樹法堂虛  
袈裟既下明宗詔  
石篆還留表聖書  
徙倚禪牀人不去  
雨花臺畔夕陽餘

予告歸入倒馬關作

蘇祐

南風吹雨傍關來  
關上千峰畫角哀  
老去尚憐金甲在  
生還重見玉門開  
鶉絃謾引思歸調  
虎節空慚上將才  
聖主恩深何以報  
車前部曲重徘徊

萬卦山

憶從開闢分奇偶誰謂歸連演帝農渭水自浮龍馬瑞  
汾涯原列卦爻峰四山叢薄搖蒼草三古遺編勒鼎鐘  
見說高齋日相對欲隨杖履未從容

李牧祠下眺望作

泉源冰竇入春分鳥語花香遲客聞戍鼓寒沉龍塞月  
夕烽晴照雪山雲年來近野多戎壘時過迴陽幾鴈羣  
險絕頗憐今昔地莫教空說李將軍

真宗行宮銘碑金人

宋帝行宮汾水邊翠華想像杳風煙天書雲篆今何在  
玉檢金泥竟不傳伐石自鐫西祀日渡河翻恨北征年  
金人十二多零落雙立猶看輦道前

太原懷古

獨上山城思寂寥英雄千古恨難銷鳴蛙尚產居民竈  
驚馬空留義士橋齊洞僧歸雲冉冉漢宮人去雨瀟瀟  
堪憐此地多離亂莫向明時負酒瓢

戊寅中秋同諸友泛五姓湖宿延祚寺

王崇古

芳湖尚憶昔年游水色山光接素秋  
歸去幸逢金石友重來同泛木蘭舟  
白蓮一望能超悟綠酒頻斟頓解憂  
禪榻高懸消永夜清風明月共悠悠

藐姑射山

大谷名傳姑射山瓊宮仙宇隔塵寰  
澄潭潏潏沉蛟窟秀嶺逶迤虎豹關  
樹色晴連山色好鳥聲幽並水聲閒

坐來蒼翠清人骨，思向山靈一破顏。

十一月朔孝義道中

高叔嗣

山城風物歲將闌，行縣初因問俗安。  
授歷漫驚違一載，趨朝尚記逐千官。  
煙鐘動闕天微曙，火樹薰庭夜不寒。  
久忝恩私今始悟，簿書催急驛程難。

禡亭聞邊事用李川甫韻李大梁人

北來風火震邊州，春興無聊客鬢愁。  
得喪此身真是馬，姓名與世任為牛。  
晴天亂雪吹空谷，落日黃雲滿道周。

但有鄉心隨處似題詩人滿驛前樓

雨後柏井同方體易

疎館餘晴片日暉陰移高樹晚涼微自窺水檻人將老  
轉念山扉客未歸天畔綵虹臨戶映風迴白雨過村稀  
荒庭一醉拚君共呼取濁醪興莫違

星輶驛

萬山詰曲此孤亭遠客西行暫所經生事不堪頭早白  
世情無賴眼常青深林落日憑軒望亂葉吟風隔坐聽

寄謝蔚羅當日者高飛今已入冥冥

權店晚行

孤城吹角罷黃昏歸馬蕭蕭向驛門  
衰柳更添霜後色殘流初耗雨餘痕  
求田未果青山願出守仍銜紫禁恩  
轉入亂峰行不進投身空館寂無言

南關晚行

笳聲入晚不堪聞驛路山腰向此分  
洞壑空濛秋雨雪岩崖突兀石生雲  
愁心胡馬方頻入寓目冥鴻定幾羣

歸興轉從今日盡將因沙塞著微勛

過寒湖嶺有感

王道行

征途公役幾番來石路重重點翠苔  
野鳥翩翩依樹轉山花馥郁向人開  
清溪最好消塵思佳木寧甘作樵材  
因憶十年憲半約蕭蕭孤劍且深杯

金閣寺

架壑朱甍乍有無林開福地忽平鋪  
蓮花十丈承神足貝葉千函鎖佛圖  
香積厨中松火冷涅槃會上石牀孤



大身自有非身智具眼人間幾丈夫

塔院寺

宣文皇太后重修

千花成塔自何時七寶新瞻結構奇曾是神僧飛錫去  
俄傳文母下檀施空中鐸引鈞天樂庭際龍蟠護法碑  
惟底曇花常一現太平天子本無為

南臺經宰殺溝遇雪

伐木丁丁日影疎猿吟虎嘯傍僧居雲穿兩峽行相失  
雪散諸天畫不如南極老人迎杖屨西方大士借蘆廬

疑情莫問拋刀事直往誰當廣額屠

七岩廟

云是磨  
筭夫人

七岩祠廟枕山隈話說磨筭事可哀為覓寶符墟代社  
却傳弓韜禮高禰幽泉尚咽生前淚化褚猶飛亂後灰  
天為孤貞延血食故教人乞子孫來

和朱開府再遊桂子園四首

并序

朱公秉器昔與張助甫過桂子園賦詩命酒篇什傳  
於人間為一時盛事今逾十年來撫全晉而助甫聞

問遠在千里秋日枉訪遂成四詩倚韻奉答如左雖  
蟋蟀之音為細已甚亦大風之一籟也

元戎十乘入并州彭澤東籬是舊遊問柳已成枯樹賦  
懷人如泛剡溪舟丹楓妙簡推三絕青玉高歌倚四愁  
此日寒篷尋往事綵雲若為故人留

節鉞重來撫晉封皇皇列辟奉車攻不矜開府鈞衡重  
特訪逃虞石戶農老我西山窺隱豹看君北斗翊飛龍  
祇緣同調心相許雞黍衡門也易供

釣隱當年破綠苔相攜俱是郢中才  
乘槎使者雙星隔把鉞師臣四履來  
十載行藏凋白髮幾人樽俎淨黃埃  
風流此日還吾黨絕代文章一酒杯

銀黃清影鳳池遙星渚經年別恨銷  
廓落剛腸河朔飲浸淫大宅廣陵潮  
青山入夜如逃酒芳樹臨風冑棄瓢  
非愛習家池上酌採風深計到漁樵

登通明閣

我愛天仙駕玉龍琳宮千尺俯堯封  
中空烟裊飛丹鼎

北阪晴連偃蓋松千里并汾卑下界九秋風露躡高蹤  
凭欄無限幽棲興暝色侵人失遠峰

巫相祠

靳學顏

巫谷峰頭幽草淒巫公祠宇遶清溪千年人物留遺像  
兩世勛名有斷碑峻嶺倒懸紅樹遠小橋斜插碧雲低  
荒祠蕭索無人跡烟霧茫茫日正西

遊五龍廟

栗應麟

絕巘龍祠紫翠中褰帷拂曉入巉巖三山海氣蒸初日

萬壑松濤走半空，朝夕風雲隨世變。  
古今登眺幾人同，若知度水尋花意，始信桃源有路通。

龍山別業即事

栗應宏

葺屋空林伴翠微，柴門無事柳依依。  
隔年藥物頻宜日，近午茶烟欲上衣。  
山郭歲時流水舊，野堂風雨到人稀。  
興來獨步多尋賞，為問茅君理息機。

喜雨

丙申夏且旱作亭日會大雨衆賓喜甚余躍然賦此

白世卿

偶合坡公喜雨記，為尋吳令納涼軒。  
高山萬點青為幕。

流水一溪近在門爽快人心六月雨消磨世事百年尊  
西堂客散黃昏後知有田家醉瓦盆

紫荆關

尹耕

漢家鎖鑰惟元塞隘地旌旗見紫荆斥堠直通沙磧外  
戍樓高並朔雲平峰巒百轉真無路草木千盤盡作兵  
誰識廟堂柔遠意戟門煙雨試春耕

春日登栢塔山見老栢一株巍然中踞四山萬栢  
皆環拱而立山僧白此栢母也遂識以詩

鍾 恕

冉冉春風上客衣  
登臨初識萬年枝  
雲枯老幹天根迥  
日下香稍晝影遲  
徧種兒孫分翡翠  
飽嘗霜雪鬪離奇  
摩空獨與星辰伴  
清蔭千番產紫芝

登朔州城樓

霍 鵬

明到西南是朔州  
居延川澤繞城樓  
山連虎峪偏生霧  
地接龍庭怕及秋  
但說東靈蕭刺史  
那知北塞晉陽侯  
眼看廢壘蕭條甚  
幾箇耕童日牧牛



目擊礦監害民有感

幾道烟籠白石山，雕窩木井廣昌間。  
縣城正厭蠶狐砦，驛路斜通倒馬關。  
詔出金門中使急，疏開銀洞幾家閒。  
為愁罷礦書徒上一夜，西風兩鬢斑。

自路村抵夏縣途中遇雨

顧雲崖

獨坐肩輿信所之，逼人清景易成詩。  
四山嵐氣雲生處，滿樹風聲雨到時。  
地渴每逢田老問，路遙只恐僕夫饑。  
先憂後樂男兒事，千古希文敢自期。

送同年張子畏使代二首

梁有譽

使星遙指晉陽城，曉度郊原鐵騎迎。  
狐塞天低橫殺氣，鴈山秋早動邊聲。  
書生倚劍心徒切，諸將揮戈意未平。  
若過北堂春宴罷，還將籌策獻承明。

征馬長嘶起朔風，獨憐平子思無窮。  
煙塵正值蕭條候，世事空歸感慨中。  
雲暗故關聽斷角，日沉殘壘見孤鴻。  
懸知弔古經行處，好問當年李牧功。

春夜宿蓮花洞

呂陽

尋真深入晉山隈  
試向陰岩問野梅  
鹿女已從塵外去  
蓮花猶傍洞前開  
律吹一夜春迴谷  
雲斂中天月滿臺  
可是仙蹤知不遠  
珊珊環珮步虛來

宿蓮花洞

裴邦奇

姑峰千丈插雲隈  
綽約蓮垂玉洞開  
一夜靈風天外起  
三山仙珮月中來  
星臨幽窟龍珠動  
露洒長松鶴夢迴  
欲借石牀聊偃卧  
滿空寒翠濕青苔

雙林寺

孫繼魯

南下臺泉三十里忽逢佳寺說雙林山前耕地有千畝  
門外好松常數尋涼拂溪風消暑氣香飡澗水滌煩襟  
覺餘一枕藜牀夢自掃蒼霞爛漫吟

小憩清正庵

并序

馬巒

丁酉季夏余過朱呂村避暑清正庵左有碑先正歸  
學士所撰元平章政事秦曼公生祠記也乃里人王  
義所建祠已湮廢曩余修邑志又遺而弗紀為之悵  
然庵主具茶硯徵詩漫題於壁并致感慨云

廼蠻祠廢蒼山舊清正庵閒白日斜雨鮮剝餘猶有篆  
海榴謝後更無花飽行細讀元賢刺暑渴忻嘗羽士茶  
好古幾人同我僻不辭歸騎逐昏鴉

栢井寨習射

郭紘

西原入望黯風雲故壘蕭蕭斜日曛弓矢正勞同角藝  
酒杯真不到論文魯鄉舊俗曾觀射周典何年可散軍  
聞道雲州圍未解邊方戎馬盡成羣

樓煩

蔡可賢

山後山前十六州天涯盡處是偏頭雲開大漠風沙走  
水折長河日夜流萬戶金縉愁見月千羣鐵騎畏逢秋  
却思大漢無中策一曲哀笳倚戍樓

登黃榆馬陵諸山四首

李攀龍

太行山色倚巒岼絕頂清秋萬里看地折黃河趨碣石  
天迴紫塞抱長安悲風大壑飛流曲白日千崖落木寒  
向夕振衣來朔雨關門蕭瑟罷憑欄

西嶺秋高大陸前馬陵寒影踏遙天羣峰不斷浮雲駐

絕嶂長留落日懸地險關門衝急峽山竒削壁挂飛泉  
何人更遇青泥坂有客空歌白石篇

西來山色照邢襄北走并州擁大荒巨麓秋陰沙渺渺  
石門寒氣雨蒼蒼天邊睥睨懸勾注樹杪飛流挂濁漳  
搖落故人堪極目朔風千里白雲長

千峰郡閣望嵯峨此日褰帷接塞過落木悲風鴻鴈遠  
白雲秋色太行多山連大陸蟠三晉水劃中原散九河  
回首薊門多殺氣羽林諸將任橫戈

行宮寺和白岩先生韻

趙思誠

禪林獨步日初斜  
踏徧羣峰萬壑花  
高谷響零霄漢水  
深岩隱見牧樵家  
驚猿掉臂啼蒼壁  
休鳥梳翎點白沙  
為憶舊時喬太宰  
百年佳句倩雲遮

弔大興尹黃連死節

賈仁充

兵弄黃池勢震驚  
先生獨立衛民生  
倉皇應變非無策  
慷慨全忠豈為名  
廟號有嚴瞻許遠  
汗青拭淚寫真卿  
應知一點英雄氣  
化作山河壯帝京



秋思

儲良材

秀容城在萬山中爰訪耆賢識舊踪白石有仙曾跨鶴  
清江乘馬是真龍神鏞世久遺聲遠銅鼓峰高晚照紅  
翹首岢嵐烟樹裏不勝寥落聽西風

過汾河

中霍三年幾度遊素汾不盡向東流鄉心逐水湯湯下  
客思如嵐隱隱收林木無風棲匹鳥柴門有樹繫孤舟  
明朝峴漢當行樂落日銅鞮未肯休

過汾陰祠

張佳尹

亭上秋風萬壑哀  
武皇天翰有遺臺  
秦圻神鼎黃雲蓋  
輦道游龍碧殿摧  
松檜古壇虛歲月  
漢唐殘碣護莓苔  
祠官回首方傾日  
搖落河東獻賦才

土堂怪栢集古

夏宏

洞門高閣靄餘暉

王維

古栢參天四十圍

薛濤

皓鶴驚

風翻雪墮

范大成

蒼龍挾雨帶雲飛

薛逢

年多物化根

株別

李嘉祐

谷變陵遷世事非

王初

聖主只今資大用

韋蟾

廟堂柱石肯相違

周永定

任公祠

王穉登

蕭蕭遺像鎖荒祠尚憶孤身百戰時  
諸葛事繁那得久留侯貌弱到今疑  
絳帷香氣衣冠暗石棟斜陽薜荔垂  
曾是當年騎馬地烟中往往見旌旗

六師洞

張拳

參破玄機控玉龍西遊天竺碧蘿重  
松巢鶴去烟霞滿沙徑人稀蔓草封  
花謝石男緣雨瘦白殘雲母任泉春

大師遊後無消息寂寞青青數點峰

蓮花池

魏煦

畫船簫鼓畫鳴榔宛在中流水一方波面迴開神女鏡  
花容嬌妬美人粧貂蟬入座詩偏麗歌舞留人夜未央  
世載昇平多樂事鑑湖那復乞君王

香山瑞雲寺與客共坐樹下幽禽鳴其上聽而悅  
之竟不知其何鳥也為詩一章 王家屏

徙倚松陰暫避蒸綿蠻幽鳥隔林聲風停高樹喧逾靜

響落空山淒復清  
客座乍聞如有意  
僧家慣見不知名  
綠窻鸚鵡應慚汝  
學得能言悞此生

登晉陽南城樓

李維楨

高城飛閣孱顏陡絕丹梯手自攀  
四塞西開秦道路  
百盤中吐晉河山  
雲邊兩觀扶鷗尾  
天末諸峰出鴈關  
能賦望鄉俱莫問  
清尊好趁羽書閒

咏清涼山二首

郭子直

清涼山對射堂開  
幾欲臨流問渡杯  
祇是陽城勤撫字

非緣孟尉不追陪，盟虛鸞鶴慙。  
逋客望入烟雲，護楚臺。  
雪勒春寒，花事晚，只今猶及看花來。

倚山臺，殿景偏幽，風日宜人。  
自可留顧我，獨慚黃綬尉。  
與君同醉，碧霞樓，萬家春樹和烟綠。  
一曲陽河抱郡流。  
立馬城東，重分手，仲宣何以答荊州。

金山綠洞

楊維嶽

修蛾隱約亦璘珣，俯瞰并原渺。  
一塵浮碧，將無凌朔氣。  
憑虛疑是化金人，故侯骭骸千秋在古洞。  
神竒異代論。

莫以金銀誇氣象  
桃花久暗武陵津

介休道中

程可中

征旅聊因當勝游  
庶饒那復數中州  
雪融隙地培桑棗  
日出通衢噓馬牛  
望望繇山侵面出  
時時汾水避人流  
太行春色黃河外  
猶自嚴寒滿敝裘

王官谷樂隱

許莊

杖藜徐步看青山  
笑向東風解醉顏  
幽徑有花春正好  
柴門無客晝常闕  
辟開荒地二三畝  
結上茅廬一兩間

睡到日高猶未起  
卧聽流水任潺湲

元遺山

何允泓

滄海橫流著此身  
中原天日照累臣  
明昌大定三生夢  
欽叔希顏一代人  
野史亭中遺汗簡  
讀書山下起埃塵  
幽蘭灰燼今何在  
千載空餘老角巾

登恒山

王濬初

崔巍直與太清齊  
翻覺星河影漸低  
呼吸應知通帝座  
登臨總不藉仙梯  
任從天險穿雲度  
豈是冬巡為雪迷



最喜山靈却封禪，  
渾無玉檢共金泥。

嶽岑玄岳萬山宗，  
縹渺天門箭筈通。  
誰遣五丁開聖蹟，  
只教太乙顯神功。  
靈岩噓氣龍泉水，  
空谷傳聲虎口風。  
秦華嵩衡堪並峙，  
何須括地較雌雄。

白雲巢成四首

邢大道

東林三畝白雲居，  
竹石蕭然洞壑虛。  
夾徑徧栽棲鶴樹，  
流泉雙引灌花渠。  
秋風黃菊籬邊酒，  
夜雨青藜案上書。  
垂老此生堪自托，  
侯門不必曳長裾。

石門一徑匝青苔  
小閣虛牕傍水開  
南畝雨深春負耒  
東山月霽夜啣杯  
貧如顏巷多丹井  
清似嚴灘少釣臺  
學種三芝無可覓  
讓他黃綺是仙才

布袍芒履白綸巾  
偃蹇衡門此病身  
清世烟霞誰作主  
小堂風月自宜人  
花開歲歲春無恙  
詩就篇篇筆有神  
華髮交知半零落  
相看魚鳥轉情親

小山當戶樹蔭從  
倚樹看山萬慮空  
客去藥爐添石火  
鶴來琴榻起松風  
名逃巢許千秋上  
夢覺羲皇一枕中

獨有草玄書未就十年閉閣媿揚雄

代州譙樓

周宏禱

天涯作客獨登樓長笛誰歌出塞愁  
勾注遠從雲外落滹沱近向檻前流  
白狼漢壁人千古紫鴈秦城土一坏  
正是逐臣堪洒淚涼風五月易成秋

過石嶺關

魏允貞

竭來早擬拂衣還閱歲仍過石嶺關  
白髮逢秋看更短朱衣向客媿投閒  
金銀海內方生色戎馬中朝未破顏

迂謬自知無寸補  
虛將封事動朝班

李晉王

田中穎

鴈門僕射萬人雄  
年少提戈奏戰功  
徇國猶延三主祀  
精忠不帝一方中  
鳳飛金穴空餘井  
龍起沙陀舊有功  
縱使後唐非李氏  
已酬宿憤對蒼穹

靈空山題先師寺

俞汝為

萬仞懸崖卓錫遊  
蕭然一鉢寄淹留  
橋邊忍草穿雲濕  
洞口曇花出澗幽  
心印自來歸帝子  
禪那寧復羨王侯

停驂顧影憐蹤跡笑指靈空學漱流

雲蓋寺

周一梧

白馬來從天竺西寰中勝地盡招提  
浪仙曾借禪關隱雲蓋因留蘭若題  
落日荒山迷草徑連天絕巘擁虹梯  
雄文古剎消殘劫忍聽愁猿午夜啼

過紫荊關贈管參戎

張銓

燕薊西來第一關孤城萬仞白雲間  
風吹鼓角樓臺動日閃旌旗虎豹閑  
拒馬河遙通一徑蜚狐峽迴繞千山

將軍自有封侯骨，破虜何時奏凱還。

元日謁孔廟示諸生

文翔鳳

天道左旋地四游，更乘生氣泛虛舟。  
黃河帶束庖皇錦，太華冠垂孔父旒。  
東過鴻濛三萬里，西迂豎亥八千郵。  
彎弧好射蓬萊庫，督領仙臣課祖洲。

桑乾道中

陳鴻

征程十里見桑乾，二月誰憐尚苦寒。  
沃地北來邊塞近，流澌東下早春殘。  
風移竹箭穿貂帽，雲作楊花點馬鞍。

旅况壚頭消不盡琵琶纖指莫教彈

玉壁故城

王時濟

玉壁空城隱暮笳  
鄖君曾此建高牙  
鐵騎戰後餘秋草  
金鏃拾來半土花  
落日斷雲歸古堞  
西風獨木噪寒鴉  
當年勅勒歌猶在  
眼底興亡更幾家

謁韓侯廟

曹于汴

辟穀仙人蹤跡杳  
烹國士血痕斑  
翔同孤鴈真竒絕  
淚洒千秋豈等閒  
誰向浮生能繫日  
未隨腐草便開顏

徘徊相羨爾能死不死淮陰市井間

珍珠泉

程啟南

幻世功名畢世忙猶然漚裏弄珠光  
摘來不解盤中走撒去還隨波上揚  
陳有宮人知就賞燕從使客得招涼  
問珠幾許今何在山色幽幽澗水長

杪秋登龍門望河樓

趙用光

風雷盤薄撼崔嵬湧出東南百尺臺  
岸束驚濤當檻落暈飛高閣倚天開  
浮雲蕭索中原盡秋色蒼茫萬里來



欲向清尊問千古夕陽西下斷鴻哀

龍岩夜月

張璞

龍岩寺裡鎖樓臺寺外懸崖草閣開正對東南山一豁  
纔臨薄暮月先來琉璃寶色搖金界蒼苔香花印玉苔  
莫借支公牀子卧松風露溢月光杯

恢復府谷

并序

宋統殷

保德府谷一河相望雖分疆域而安危共之屬以逆  
氓負固久稽天誅余竣役平汾直抵保德數月不下

之賊八日而復漫書之以記歲月時庚午仲秋二十  
六日也

長河怒浪拍天開何事旌旄拂地來野色迷漫橫水陸  
王師震迅失風雷無端羯鼓中宵盡有脚陽春絕域回  
秦晉封疆緣底事可能無意出羣才

萬里關河指顧間凭欄一望戍樓殘風迴鴈影秦山曉  
霜冷旌頭晉月寒何事標銅銘廣莫須完壁報長安  
憂天百轉孤臣慮未許他人袖手看

謁張睢陽廟

王 鎰

並推逆虜滌函區  
郭李全師公一隅  
六矢將軍寧計面  
千金愛妾自捐軀  
荒宮雀鼠兵威在  
遺貌鬚髯史傳符  
自笑經生老無意  
只思架上試抽書

宿鋤溝鎮和石橋韻

王素屏

白髮年來種種生  
幾回對鏡使人驚  
故鄉北望三千里  
官路西行數十程  
廿載離家緣薄宦  
半生悞我是虛名  
夜深孤館渾無寐  
獨伴寒燈待月橫

詠署中白牡丹

袁繼咸

誰向風塵澹世情，孤標肯與鬪輕盈。  
翠妝不入姚家夢，玉板知非楊氏名。  
風雨無聲憐素質，乾坤有意老幽盟。  
倚欄莫謂花迎笑，皓月寒潭共此清。

送僧遊五臺

洪恩

徧參南北了無從，瓢笠經行萬壑松。  
螺髻雪中旋五頂，鷲頭雲外宿諸峰。  
平鋪世界光懸鏡，倒射關門日下春。  
草樹總能前後偈，漫尋童子不知蹤。

國朝

龍巖會

朱之俊

俗緣未脫也難攀甚幸芒鞋度此間漫問僧間何所事  
為言雲嬾亦須刪摘來野蕨剛支客步到神梯始盡山  
搔首層岩真是快不禁長嘯發林彎

送兵部董侍郎漢儒總督宣大二首

失名

幽并兩道建牙中列帳蕭然靜朔風千隊市場來種馬

百年御幄護槐龍  
軍前揮扇油幢碧  
閣裏傳籤畫燭紅  
挿漢一山屏障外  
更煩前箸策遼東

素囊游牧近雲中  
挾賞連兵勢漸雄  
併鎮規圖傳往牒  
擺邊殘卒卧雕弓  
中朝但出金繒計  
虜婦頻仍玉冊封  
屈指中興功第一  
雅詩吾欲嗣車攻

送楊猶龍學士按察山西

失名

碧山學士起嚴裝  
新把牙旌下太行  
玉塵開尊從將吏  
銀毫判牒喜文章  
三闕日落凝笳吹  
千騎風流出射堂

憶賜錦袍天上暖西遊早拂鴈門霜

一天涼影散鳴珂落木平沙鴈度河北地詩名三輔少  
西風客思五原多紫貂被酒雲中火鐵笛迎秋塞上歌  
回首禁城從獵處千山殘雪滿滹沱

送當湖馬覲揚備兵岢嵐

絕塞驅車出定羌洗兵空磧散牛羊黃河盡處無征戰  
紫燕飛時敢望鄉獨客登臨傷廢壘前人心力困危疆  
君恩不遣邊臣苦高卧荒城對夕陽

送王孝源備兵山西

秋盡黃河氣欲收  
千山雪色照并州  
鵬盤落木蒼崖壯  
馬蹴層冰斷澗流  
父老壺關迎節使  
將軍廣武恥封侯  
雍容賓佐資談笑  
吹笛城南月夜樓

石壁

馬世俊

水作瑤琴石作絃  
琳宮仄在曲崑邊  
四隅高厂遮長日  
一凹晴雲納小天  
雕像兒童原是佛  
聞音鳩鴿忽成仙  
適當春夏詩書候  
問字西河就隱泉



月波湖

交城城內小西湖裝就風流作畫圖  
寺界比於三竺靜  
波光涵得兩峰孤  
紅樓窻裏調鸚鵡  
白紵簫中響鷓鴣  
父老兒童隨岸賞  
歡傳此景自來無

過保德

大梁分野次旄頭  
歲暮緣邊雙鑿游  
杖履縱橫三戰國  
悲歌震動五諸侯  
元龜倒吸龍門峽  
赤豹橫眠鹿徑溝  
長笑因人成事者  
劉琨徒自老并州

澹林楓樹已蕭條  
穴處山農帶雪樵  
城坐寶蓮鍾地脉  
河從神木駕天橋  
冰魚味勝鱖鯉膾  
石燕紋如翡翠綃  
深謝居停勤念客  
綿封霜菓餽僧寮

釣臺懷舊

白君琳

開山峭壁半崩墮  
下有當年九曲池  
西閣歌殘天籟響  
南樓舞罷夜蟾輝  
青娥嘖感知今日  
黃鶴飛鳴憶昔時  
最是閒愁無處詰  
傷心偏說峴山碑

送李谷愚之任廣靈

施閔章

素交眼底獨推君  
古道文章迴不羣  
家傍清江心共許  
人當燕市手重分  
馬蹄曉踏白登雪  
雉堞晴看紫塞雲  
聞近襄陵多美酒  
不妨賓主共論文

甲申贈彪西范君

熊賜履

時巡清蹕古河東  
存問蕪榮心隱翁  
窈窕山林深雨露  
翩翩雲鶴近蒼穹  
雲箋新洒光同日

聖藻高懸氣若虹  
從此烟霞留盛事  
瞻依拊舞百寮中

題文中子讀書處

吳璵

廢洞依稀石麓陰山靈招我一來尋  
泥橫殘篆碑猶在門掩蒼崖鳥亂吟  
獻策緣知非釣主退耕何事已違心  
浮沉千載誰能識房魏區區尚古今

禹鴻臚畫樊川歸樵圖

陳廷敬

巷柳園花又一巡二毛加白尚青春  
平生但可供描畫面目于今是假真  
蔡澤輕肥原有相揚雄容貌不踰人  
束薪已辦腰鑿具寫入樊川小樣新

玉山

鐵鎖鈎梯細磴分半空時有鳳簫聞雙峰來送三清月  
萬壑全收太岳雲插漢桂榆垂欲下摩霄龍鶴動成羣  
人間何限卑棲意待剪香茅嶺上耘

送少師衛公還曲沃二首

一卧雲霄殿閣空遂初容易別鸞鴻

兩朝清論冰心後四海蒼生病疏中絳灌調和惟相國廟  
堂鎮靜賴元功玉堂制草西清直幾處孤蹤歎轉蓬  
黃扉十載握絲綸勅斷來章請急頻詔祿還同三省

厚賜金特為二疏貧舍人圖史歸裝舊驛路雲山入夢新  
先帝老臣今澤渥祝公眠食慰斯民

登塔

曹溶

域內浮圖盡得名崢嶸獨此運斤成蜃樓不敵飛輪巧  
鷲嶺偏移畫棟輕晝寂爐香歸藻井春晴花雨下金莖  
徘徊悟得無生理身在烟霄象外行

上元後五日本塔寺重遊

臨邊淨域喜重登春氣熏人健短藤妙諦本難求色相

禪宮何以託峻嶒倒啣鐵鳳風中鐸徧放金鰲午夜燈  
曾在恒峰舒醉眼秋毫百里見觚稜

寄懷左翼宸先生

魏象樞

古貌古心接太初先生久與世情疏霜寒北岳人無夢  
雪滿金城飯有蔬絕代行藏三徑菊百年貧病一牀書  
吾鄉咫尺高山在欲見無由托鯉魚

甲申闖寇陷兩鎮宣鎮朱撫軍雲鎮衛撫軍朱兵

憲死之

高懸節鉞鎖重閩就義從容報國身  
闕塞千金收死士  
京華一臂失儒臣  
正當首鼠行蛇日  
不愧攀龍附鳳人  
三老忠魂稱鼎足  
好將生氣護楓宸

甲申閩寇陷宣雲  
李生若蔡姚生時中死之

二城三烈久相傳  
更有書生義並聞  
泮上衣冠懸日月  
樓頭婦子直顛黃  
雲巖嶽疆謾託  
專征將大事空餘報國文  
十夕鼎湖龍已去  
不堪揮淚向山君

哭于北溟總制



簡命深叨宵旰知臣心精白總無私清風亮節高千古  
吏治民生濟一時寢食難忘垂注重死生未報

賜金慈巖疆賴有斯人在何事驚傳箕尾騎

生與同庚性不殊居然三晉兩迂儒憐君盤錯身應瘁  
顧我膏肓病未蘇南望江河誰復挽北瞻雲日總難呼  
當年薦草曾聞否歷盡平生一語無

甲申闖賊陷寧武關周總兵戰死

大呼高帝出城闈三百年來此一身帳下投醪多戰士

軍前拔幟是孤臣，裹尸不媿真男子。  
擐甲曾聞有婦人，若使將軍猶未死，  
芟芒那敢近中宸。

過小關嶺同雲門衝風而行次南曠見贈韻

四月披裘度小關，  
緋桃處處亂烟鬟。  
無言說夢心難穩，  
有客同歸意自閒。  
一部山河隨我過，  
十年風雨共君刪。  
平生竊望山能學，  
不信山中更有山。

送儲廣期明府

重來獻賦謁京畿，  
仙令雙鳧願已違。  
大雅文章真落落，

古人模範自依依人從玉署搞文藻君合銅章讓布衣  
聖主憐才多異格種花滿縣載花歸

挽畢方伯亮四同年

負耒躬耕百畝寬此身生死在雲巒誰從海內知班馬  
我向山中識范韓萬卷遺書皆手澤千秋佳話一清官  
重來京國傷遲暮不是中朝薦士難

麟頌

陽回斗北一麟孳牛尾膺身更不疑紫塞籠烟徵瑞氣

龍沙度雪接昌期風和雨潤逢年後子孝臣忠報國時  
自是太和仁德感輜軒好載史中詩

驚聞神物產山田陰雨牛鳴豈偶然斗室霞光村牧恠  
空梁月照野人憐香含七竅端端異甲裂千紋片片堅  
倘得靈胎圖上苑素屏應注使君賢

麟頌

李旭升

太平時節事多幽掩卷河圖彷彿求口吐丹書身是甲軀  
非白鹿背皆疇農房止見飛虹降上苑還宜畫影遊有道吾

君文德感萬方從此荷天休

梗陽官舍

儲方慶

傳舍周圍都是水人家零落竟如山祇緣地僻堪容懶  
誰道官貧却愛閒燕雀競喧堂寂寂芝蘭空覓草班班  
何時得遂歸來志三徑荒蕪獨往還

九月清泉寺登高

黃葉黃花簇馬蹄平泉一路歷高低每逢令節容官假  
行到空門認客題郭外寒雲天漠漠望中秋氣草萋萋

茱萸解厄應長佩滿目蕭條日又西

中隱環青

一年幾度到山中四面青山一梵宮  
夾寺飛泉歸絕壑入雲高嶺駕長虹  
登臨有路開樵徑晤對無心屬畫工  
多少烟嵐堪領畧吾將大隱與誰同

平泉流碧

不老池邊且濯纓可能洗耳便埋名  
千章灌木稀人跡百道流泉和鳥鳴  
此地自宜耽寂寞使君何意厭逢迎

琴高一去無消息有約來騎海上鯨

夢餐優曇花作

于成龍

余讀書山寺時夢餐優鉢羅花即吟一句云仙人賜我  
鉢羅花醒語純天和尚檢藏乃知鉢羅花即優曇花  
也因賦以志

優曇曾記夢中餐山寺日高栢水寒雲繞佛龕常五色  
香飄精舍比芝蘭生平不識金銀氣偶爾輕拋麋鹿灘  
四十年來魔障盡好教拂袖紫霞段端

米山定林寺

畢振姬

黏天峰側野橋灣  
米子開州直寺間  
白鹿去來小朗洞  
青羊今古大糧關  
詩禪四壁香留座  
宦學三年御見山  
回首懸崖清入夢  
石淙花雨水潺潺

秋日集普門寺有感

秦世英

惱殺寒蛩碎客心  
短筇曲徑訪雲林  
十千酷酒消坯塊  
一夕雄談破古今  
世事到頭誰定局  
天涯何處不知音  
諸君漫唱闌中曲  
座上青衫淚已溱



太原觀獵

王綬

雲屯千騎晉陽東，圍合川原鼓角雄。  
金距黃眸翻落日，青曹白望逐長風。  
窟深狡兔遺三矢，人立封狐跨五驄。  
何久歸途銑曲發，書生羸馬障飛蓬。

劉思齋游麓臺山以記見示并錄壁間張中宿先生詩步原韻即呈太乙思齋

麓臺青峭白雲頭，杖策高閒羨此游。  
石起疊峰何處是，巖常名澗客初留。  
欣看萬壑千岩記，幾上城南縣北樓。

失却龐公存守黑壁間題句細凝眸

過百穀山偶題

失名

草徑通幽曲遶村路從石上躡雲根太行來脈中天近  
炎帝神功萬世尊深谷風生松有韻巉巖雨過蘚添痕  
更看千丈山頭栢長共青青古廟存

登天臺山樓作

旅况蕭條落照間浮雲南望是鄉關諸峰竒樹金銀合  
二水平沙鷗鷺灣瓦廟樓中騷客卧石門煙裏野僧還

何時得遂巖堪約白首青山處處閒

澤州使院古松

王士祿

三株並是青牛質尤愛敲松亞復盤入夜龍形殊益恠  
隔牕濤響不疑乾人如僧憇心堪寂舞作胡旋勢未安  
韋偃畢宏那貌得祇須拭目百迴看

王北野邀遊石壁山

亂山層裏象王家乘興幽尋路未賒疊磴窅疑連洞壑  
危峰蒼不借烟霞靈禽聽法聞成果靜女題碑擬散花

斜日橫襟最高頂并汾秋色浩無涯

交山平寇

趙吉士

古岸摩碑畫土疆書生擁盾事戎行葫蘆川指新屯寨  
乳子河憐舊戰場軍吏論功無刃血村翁破涕進壺漿  
由來不殺稱神武此後何人更陸梁

小站營荷花

殷嶧

秋期妄意藕如船村種荷花代種田綠酒不分沙水際  
風香爭度午薰前輕粘白雪雙飛鷺遠接明霞一色天

無限故鄉蘋蓼夢今宵身帶五湖烟

祁縣有懷溫飛卿

金莖一冊傍紗籠照字燈花異樣紅  
名滿苦遭當路忌  
早官長以浪游終憐才幾見如饑渴  
觸諱真宜致阮窮  
不讀南華非害事肯隨文士校雕蟲

唐叔虞祠

溪毛明水薦芳馨上溯周秦世幾經  
多事空勞桐葉辨  
百番爭搨晉祠銘惜惜白晝苔龕冷  
窅窅虛堂石氣青

整夔黃冠司洒掃春秋問一啟門扃

過李衛公祠題壁

吳挺

曾向虬髯傳裏尋  
只今遺跡感知音  
書生亦有封侯骨  
幕府應無得士心  
肯負蛾眉雙眼俊  
輸他頭血一囊深  
稗官寫盡英雄意  
憑弔荒村淚滿襟

今古茫茫共落暉  
側身天地與誰依  
知人只合由巾幗  
烈士何妨暫布衣  
風月窮途甚矣憊  
河山故態是耶非  
香魂俠骨應憐我  
髀肉虛增猶不歸

再過小水鎮題壁

火雲堆裏太原遊，又逐西風向水頭。  
下馬重尋山寺碣，開囊獨上酒家樓。  
塵沙徧洒英雄淚，草木先知天地秋。  
可惜兩番攜劍過，更無人與說恩雠。

仙堂寺

趙三麟

踏徧秋山憇上方，紫瓊未許索枯腸。  
靈巖如葯能鑿俗，開士何緣恕醉狂。  
洞夾雲腥龍欲雨，風回花氣麝含香。  
懷中五岳傷遲暮，婚嫁徒勞著眼忙。

靈峰皓月

高引

溶溶月色上寒松寂寂溪山掛鏡容  
玉宇塵空清夜冷  
冰輪碾破碧雲封  
賦中赤壁高還小  
畫裏藍田淡又濃  
恍有飛仙乘白鶴  
風飄孤影度天峰

登王官谷秋望

介孝璫

祠外高樓日影斜  
秋鴻飛盡見天涯  
王官亦是論兵地  
父老誰傳賣酒家  
萬嶂烟霜全晉樹  
千年風雨晚唐花  
黃河只在諸峰下  
烽火難尋海上槎



自虞鄉行至東亭谷

陳奕禧

微霜已散日初圓  
林外清流涉澗泉  
白郭炊烟寒幕地  
紅山柿葉遠燒天  
村中索醉傾椰椀  
馬上哦詩敲竹鞭  
潦倒閒情儘如許  
未妨行色抵高眠

卦山題壁

盧川城北招提境  
棟宇千年自李唐  
九會寶幢明夙果  
萬株巖柏擁秋香  
客從遊賞清吟得  
我欲翻經俗慮長  
花雨亂飄歸路濕  
名山迴首記翱翔

南歸自交城行至太行道中即目書寄從弟崑霞

洪嘉植

孤雲十日太行連行過交城澤潞邊  
歲雨溪聲春水碓  
焚菑山脊種梯田楊花吹麥經冬雪  
蠶女條桑擘曉烟  
風土民生衣食在封書為報長官賢

清虛仙跡

陸豹雯

太平興國觀邑勝區也舊有會道俗集後院清虛閣  
下一者登閣突有道人年四十許唐巾布袍跣而坐

近中西檐柱清風洒然蓋平生未睹也急趨下呼衆  
登視至則寂然無矣坐處柱間遺五字似云一心二  
人仁粉土書衆以刀刮之復現者謂觀貌似類世所  
畫純陽子嗚呼呂蒲人靈異多著今又降陶邪好事  
者為呂像於上乃復以青飾其字惜哉者端謹質朴  
似非妄言者然字跡故在絕亦不類人為時辛未八  
月二十五日未時也予後數年至陶黃冠李本植引  
予登閣觀書言之鑿鑿而者亦尚在綴以詩為增新

景之一

參天古柏鬱千章閣敞仙來菊正黃無漏有情驚小別  
乘風驂月故還鄉竒文詰屈烟霞老古貌蕭疎海岳涼  
欲駐朱顏從羽化蓬山長日近扶桑

長子使院兩卧石得讀東郡謝四溟山人與北地  
周際巖學使山樓唱和詩兩公皆明季人四溟  
為余同州喜而有作步謝原韻 汪 灝

星軺六月駐斜曛使館聯吟思不羣同里懷人成隔代

他鄉拜石似逢君  
高樓帝子憑誰弔  
大手文章許共分  
坐對忘眠頻命酒  
月來相賞不遮雲

寶峰石鏡

梁 迪

寶峰寺碑其光可鑑  
故有碑影之題  
余為更曰石鏡  
古寺荒餘有剩碑  
真成石鏡少磷緇  
光明豈必吳江鑄  
瑩徹疑從蜀國移  
粉黛爭來矜艷麗  
丈夫猶得見鬚眉  
若令忠佞呈膽肝  
詎異秦臺朗照時

秋涼

蟲名形如蟬差大  
聲亦如蟬差促

賈鳴璽

秋涼斷續接蟬吟  
早送西風到客心  
善瘴乾坤多冷暖  
跳丸日月幾升沉  
貪魚即解彈雷劍  
別鶴還聽響玉琴  
那似長空聲歷歷  
斜陽半院韻疎林

送張劬之平遙

朱彞尊

彼汾沮洳吾舊遊  
送爾匹馬逾徐溝  
人行芳草碧於水  
日出杏花紅滿樓  
榼中酒味苦桑落  
簾外鳥聲黃栗留  
客居適意遠亦得  
搖筆賦詩何所求

送馬遵祖宰平陸

著書獨有五亭好作吏無如三晉間  
醉裏襄陵官甕酒  
到來底柱郭門山耕餘讓畔田千頃  
吟對浮查水一灣  
白鴈年年度汾曲相思烟月幾彎環

滹沱河

滹沱河上流漸急騎馬春冰滑可憐  
百尺浮橋空斷板  
孤城哀角動荒烟愁顏送老飢寒日  
絕塞因人雨雪邊  
轉憶江鄉多樂事花濃穉放五湖船

送曹侍郎備兵大同二首

司農論議朝端重副相聲名輦下聞豈意尚煩西顧策  
翻教暫領朔方軍河邊遠道人千里天外鄉書鴈幾羣  
到日關城春色早李陵臺畔柳紛紛

關榆蕭瑟二庭空埃火平安九塞通往日連師驚朔漠  
只今市馬互西東黃河天上三城戍畫角霜前萬里風  
知有馮唐論將帥不令魏尚久雲中

雲中至日

去歲山川縉雲嶺今年雨雪白登臺可憐日至長為客



何意天涯數舉杯  
城晚角聲通雁塞  
關寒馬色上龍堆  
故園望斷江村裏  
愁說梅花細細開

王官瀑布

王恭先

王官峰頂水潺潺  
直下奔流杳靄間  
千尺恍疑飛白練  
一條真是界青山  
溜穿潭底蛟龍舞  
波漾磯頭鷗鷺閒  
不用臨流解纓弁  
早將明鏡悔塵顏

涑水橫橋

三月桃花涑水平  
綠楊堤外一橋橫  
玉欄畫鎖龜鼉睡

金鏡夜開蟾兔明不見車書通萬里也看來往老浮生  
如今莫問題詩手石柱年來半已傾

京旋復入固關

上官鉉

纜出青山入帝城青山又送野人行千年有路青山在  
一事無成白髮生谷口浮雲惟自適枝頭好鳥向誰鳴  
嵩陽多少閒田地剩得農夫幾箇耕

馮家磧僨運野望

甘國基

飛濤作雪洒晴天旅客含愁望渺然谷口落霞披鳥背

村墟高樹出山巔上灘遠纜人如薺激岸狂瀾葉似船  
寄命篙師今日信一回惆悵一堪憐

安國寺牡丹

張象蒲

姚魏當年富貴春無端淨土試粧新祇緣高士尋閒客  
便向山僧借美人豈謂風來方綽約却憑雨過更精神  
江州恰似如澠酒儘可花間醉錦茵

孔壁穿輪

梅鋗

峭壁穿輪啟太虛由來塵坱自驅除不因人巧輸班斧

豈為途窮泣阮車斜映岩花春對鏡平分林月夜窺書

風山此日占鴻漸三復歸歲悟古初

孔壁又名風山

送觀公游五臺

何燦

清涼飛錫陟嵯峨六月寒生積雪多絕頂千盤通碧落  
中原一綫走黃河野猿聽法呈珍果山鬼聞經帶女蘿  
好問浮屠安舍利白毫光放燭岩阿

白燕

康熙十八年臺城南門產雙白燕出巢往來城樓數日飛去不知所向時有羅清婦沈氏

死節之美邑令陳公為沈氏設奠夢沈夫婦衣白衣謝階下人以為白燕即羅清夫婦所化云

閻 襄

迎社紅衿爾共憐一塵不染自翩翩羞教墜影凌霜鬢  
欲擬題詩借粉箋柳絮春風驚曉夢梨花明月註前緣  
雲晴碧落雙飛去不住人間晝檻邊

猗氏往蒲州道中有感

王士禎

令狐城畔雨霏霏遙指中條積翠稀西接新秦三輔迴  
東鄰故絳兩山圍空聞魏國山河美久識唐家節度非  
愁絕無心更懷古清秋風景亦沾衣

河中感懷寄諸兄

何處依依動客愁，蒲津雲物迥高秋。  
河聲近挾中條雨，關勢遙分太華旒。  
人代茫茫雙去鳥，夕陽渺渺獨歸舟。  
京華故國俱千里，心折西風鶴雀樓。

汾河懷古

劉允升

頽波蕩蕩草芊芊，巡幸曾聞元鼎年。  
哀樂情多非少壯，帝王願極又神仙。  
中流簫鼓樓船震，夾岸旌旗日月懸。  
留得秋風辭一首，斷碑苔蝕卧蒼烟。

五姓漁舟

李世德

直是真能耐碧波來如輕燕去如梭  
夢中子夜吳儂遠  
煙外前溪越女多  
泛宅浮家侵荻蓼  
斜風細雨老綸蓑  
爭須膾具臨淵日  
誰向中流認志和

遊禪巖

張修已

逃禪應是愛林深  
趺坐何嫌抱膝吟  
山聳危岩渾妙相  
鳥啼空谷即圓音  
偶離火宅陶幽興  
幾向清池照素心  
世事浮雲安足憶  
好從惠遠遊廬岑

秋日遊冠山狀元石夫子洞

苗蕃

石冠冠山玉露秋蒼林如醉勝瀛洲鍾王逸筆難拘格  
董賈雄文未逐流鴈陣幾行斜爽譜龍團七碗沁詩喉  
誰龕尼父西天上選佛場中隱狀頭

瀑布蘭若

靜寄深山九月餘晨鐘清楚一僧居未遑象簡披雲簡  
且謝金魚聽木魚流水聲中烟閣曉層雲影外石牕虛  
波羅誦罷當齋熟多少空忙愧不如



白岩寺佛前牡丹并序

謝邁

明藩藩愛此花移植府中砌以文石圍以朱欄數載  
僧夢一官紫袍黃蓋行至寺中牡丹舊所忽不見僧  
晨起呼衆述所夢視其地新芽出土寸許而藩府所  
奪者已槁矣至今花開時邑人載酒賞極盛

名種何年到上方問僧摩碣總相忘生來富貴虛藩蔡  
夢入清涼傍佛香九月霜摧容未老三春花發酒偏狂  
遊人莫作尋常看多謝山靈仔細藏

鷲峪白衣庵槐前夜合枯而復華詩

白孕彩

佛堂雙槐有輝光楚楚衣裳十二章休說心花迷覺夢  
須知貝葉判陰陽魚窺霞帔浮深沼鳥逐煙鬟度短牆  
沉在十羊池畔植非因活水有醫方

三義祠

坐談到底誤神州仰止英雄第一流魏晉河山非復漢  
闕張祠廟尚從劉當年共割三分鼎今日同升百尺樓

志在中原雖未了後人碑版已千秋

麟頌并序

魏學誠

蓋聞天人之理呼吸相通休咎之徵桴鼓必應虞廷  
勅典遂來舞獸之祥周室惠和爰有鳴岐之慶

聖朝不矜瑞異益懋皇猷而神物上應昌時聿光史冊  
歲當乙丑乃上元甲子之明年地介燕雲為西漢延  
陵之古郡九宮山近佳氣氤氳壺壺流水長清波潑繞  
聖天子軫憐邊土蠲租與賜賑頻加賢有司卧理琴堂

撫字較催科倍切於是人遊化日物樂資生烟鎖千  
村陽月春回寒谷裏霞鋪五色石麟種降老農家龍  
馬擬丰姿背上疇文千裂機星垂氣象頂間天字平  
分甲鱗鱗而趾振振定爾身全五德色蒼蒼而角隱  
隱果然瑞首四靈當秀育牛胎已有就日瞻雲之異  
若體同龍見重觀在郊遊苑之竒此真千古之休徵  
寧止一時之盛事聞者見者莫不額手而祝太平歌  
之咏之願藉短篇以誌美蹟倘荷輜軒下採附玉書

金簡以爭輝即隨野史流傳亦白雪陽春之高調云  
爾

萬國車書正永清九霄雨露散邊城頓教寒谷生春  
色遂有深仁暢物情赤紱果從何日繫青編應待此時  
成堯階遊歷今郊見獨向人間占美名

道經廣昌訪杜讓水明府不值留寄署中

地接花時百里餘春雲間引故人車每臨白水知官况  
親揀烏絲巧法書杜母聲名良不愧少陵詩卷近何如

遙憐一片飛狐月獨照蕭蕭旅夢虛

崇善寺

裴希度

迦和輕動草離離解帶留連共阿誰豈有金龍能變日  
應無鐵鳳得鳴時沙門佛化成先覺火宅燒人自不知  
梵放寂寥松樹下停車閒看舊朝碑

韓王寺

畢澍

龍吟石鼎大年長坐卧碑陰病亦香麋鹿野心詩畢曜  
麒麟高步寺韓王苔衣洗鉢山頭雨草甲橫戈日脚陽

水盡南天四百院問師何處負繩牀

三磴雲峰

萬樹

西南尤美是林巒謝屐初過得大觀漸入雲霞人不見  
已無冰雪晝長寒方從狼尾三盤上更列龍腰九曲看  
此地由來有真宅青泥應可當晨餐

塞上一種似鴈非鴈偕鴈往來本草云慈老或言  
見於升菴集然字書不遽考箸爪修喙翎毛風  
來颯颯殊為可觀鄰人雷氏買以伺夜拔邊翮

而羈之每露下風迴之候啼叫淒哀楚我心曲  
輒語以道林故事俗人笑而不答嗚呼良可悲  
也張曲江曰今我遊溟溟弋者何所慕斯言愈  
足佩矣漫賦一弔

徐化溥

夢破家山繞舊籬哀鳴切切叫雲阿蘇卿去國還鄉晚  
支遁開籠失路多九月霜繁身帶雪五更鐘斷淚成沱  
可憐不解冥鴻意却恨人間密網羅



世人矰繳慘如剗爾項何年可得白忍見寒姿隕九皋  
為悲羈旅啼孤月霜中有足漫傳書湖上無梅詎報客  
我欲相憐借羽翰那能一點葫蘆血

柏枝山

石內紋  
如柏枝

馮國琛

爭道仙人種柏竒恍疑鬼斧乍雕時參天黛色翻新影  
入地桐柯長異枝不見土開根帶古忽驚石破幹多姿  
峰頭自昔餘名植掩映盤迴上下垂

龍山書懷

德睿

深秋林木間青黃嘹唳南飛鴈影涼二十年餘離漢水  
三千里外滯中陽樓頭玉笛他山月溪上蘆花野店霜  
差喜此身猶未老一肩瓢笠返江鄉

五里莊壁上重書義棠橋詩

失名

誰憐薄命滯天涯四望雲山不見家過鴈欲隨人共遠  
悲風環掠袖重遮三更翠帳酥為酒八月邊城雪作花  
極目淚垂江水濶願將心恨訴琵琶

山西道志卷二百二十四